

東
華
續
錄

東華續錄

同治二十四

臣王先謙敬編

臣張式恭恭校

秋七月乙巳朔諭內閣前據僧格林沁等奏遵查道員黃元吉將參將曹福雲擅行正法當經降旨將黃元吉暫行革職交唐訓方徹底根究茲據奏稱訊明黃元吉因曹福雲冒領口糧不遵開導肆行兇橫卽欲軍法從事經楊繼煥范文英等代求從輕棍責曹福雲被責不服有起隊報仇之語黃元吉恐致釀成事端卽將曹福雲正法楊繼煥等並無架禍唆使情事請旨分別辦理等語此案參將曹福雲意圖虛領口糧不遂所欲肆行無忌實屬大干法紀業經正法應無庸議黃元吉於此等重案並未具稟率行擅殺武職大員亦屬冒昧糊塗著卽行革職副將范文英李安邦雖無

唆使情事而帶隊不能得力著一併撤銷勇號以示薄懲楊繼煥
本係革職永不敘用之員仍復濶迹軍營不知檢束卽著驅逐回
籍交地方官嚴加管束毋任出外滋事范文英在籍患病旣據供
無架唆之事卽著免其提質○唐訓方奏六月十五十六等日苗
逆水陸馬步隊自壽州撤回懷遠不下七八千人以一大支渡渦
倚林家圩北搶紮數營以一小支渡淮傍上洪河岸賊營附近築
壘並添礮划四五十隻以護之兩岸逆黨分股出撲其林圩迤北
之賊徑撲蔡光武趙昌富兩營蔡光武等憑牆穩守該逆撲近濠
邊始開排槍斃賊數十人賊卻而復前朱淮森等各出隊伍排列
壘後防賊包鈔張得勝等督軍迎敵蔡光武等自內擊之斃賊數
百名賊始潰退入壘堅閉不出其上洪之賊同時徑撲唐敏興等
營盤又以礮划傍淮徑衝我軍李家觜水隊許懋德等擺開礮船

互相抵敵普承堯飭各哨嚴陣以待自帶親軍徑赴上洪唐敏興等見援軍已至啟門出戰普承堯揮軍壓下斃賊數百賊乃遁去其李家觜河下賊划亦經許懋德等擊退先是諜報該逆由淝河下游後湖舟載悍賊千餘人將由劉家口繞竄臨淮以阻糧運臣卽調回姚榮旗一營移紮北岸小蚌埠而以李振基所部礮船水練嚴扼沫河口以備之其南岸苗逆死黨已革知府金汝霖爲賊內應欲截普承堯等軍之後臣計斬之十八日金汝霖之姪金泳源果勾苗黨張士端等率二千人分踞各圩並連夜在大蚌埠紮營據划大爲糧運之患十九日張得勝等軍在蚌埠與賊相持臣飭陳松等各帶隊伍約張得勝上下夾攻二十二日天色將曙各軍齊至大蚌埠立將賊划擊敗餘賊棄舟而逃斃賊無算臣查苗逆狡謀專以繞後路斷糧道爲長技此次乘壽州淪陷水陸東下

我軍飢困之餘前後受敵勉強支持晝夜勞瘁深恐屢戰力疲稍有挫折致全淮大局不堪設想蚌埠賊划雖經擊退而陸賊負隅如故虛擬稍休兵力一俟彭玉麟楊岳斌黃開榜水師趕到卽飭前敵諸軍會合進剿又奏近日苗逆以蒙城久困志在必得句結捻黨阻絕亳州糧路又於渦河北岸日添悍黨凡自蒙抵宿之小澗集等處步步爲營宿州糧路亦爲所阻總兵姚廣武因聞捻匪有北竄之說折回徐州防剿強畱不得臨淮又無兵分援蒙城糧盡餉絕設有疏虞亳州太和無兵防守勢必相繼淪亡且恐該逆乘虛北犯歸陳等屬中原大局將不可問曷若乘蒙城未失厚集援兵猶可保淮北之土疆固豫東之門戶僧格林沁見派訥木津馬勇五百來援尙恐兵力單薄未足以解蒙圍而通糧路相應請旨仍飭僧格林沁迅撥大隊星夜赴援以支危局 上諭議政王

軍機大臣等苗逆雖係自守之賊而專於偏脅各圩且兇謀陰狡每以包截官軍後路爲長技此次乘壽州淪陷水陸東下猛撲臨軍唐訓方所部各軍飢困之餘前後受敵勉強支持深恐屢戰力疲一有挫折則全淮不堪設想見在蚌埠賊划雖經擊沈多隻而陸賊仍負嵎死守著唐訓方仍督各軍竭力妥籌戰守一俟彭王麟楊岳斌黃開榜等水師趕到卽飭前敵諸軍水陸會合攻剿蒙城被圍日久一綫糧道亦爲阻絕蒙城內外僅馬新貽英翰兩軍勉力戰守而兵力無多糧運屢斷情形萬分危迫殊恐難復久支吳棠所派援蒙之姚廣武一軍因徐境各匪有裝旗北竄之信調回防勦兇據該漕督所奏又有豫東兩省回宿敗捻誘脅各圩眾至數萬其李大箇子等在宿州煽脅各圩已有二萬餘人聲言裝旗北竄等情壽州陷後苗逆勢已復張若不及早埽除將來北路

大軍南下亦恐爲捻逆中阻勢將不可收拾吳棠與唐訓方所奏各情大略相符均請飭令僧格林沁移師赴皖情詞甚爲迫切前據僧格林沁奏俟攻克白蓮池後令黃國瑞帶兵往攻苗逆當經諭令該大臣以傳振邦熟悉徐宿一帶情形可卽令帶兵前往見在蒙城如此危急苗黨捻匪如此之多該大臣卽不能親往必須調派得力兵將前去方能有濟傳振邦黃國瑞二員中何員最爲得力著該大臣酌量迅速調派一面奏聞唐訓方仍卽就所有兵力竭力拮据以待援師毋稍疏失吳棠嚴飭姚廣武速將宿西各匪剿除卽折回宿境與馬新貽英翰等軍聲勢聯絡以通蒙城糧道並著該漕督懷遵疊次諭旨源源接濟毋令乏絕訥木津桂錫楨之軍已有招降李大箇子股匪之稟何以該匪又復糾黨裝旗聲言北竄是否訥木津等稟報虛捏抑或李大箇子肆行反覆著

僧格林沁嚴密確查仍飭訥木津等速行折回宿境合力剿賊毋
許觀望唐訓方所奏有已革知府金汝霖爲苗逆內應見已計擒
就戮此等衣冠悖逆殊堪髮指其籍貫何處眷口何存例應連坐
著唐訓方密行查拏辦理將此由六百里各諭令知之○以東省
漕運遲延諭閣敬銘嚴催○丙午李鴻章奏蘇州踞賊以吳江震
澤縣城當江浙之衝爲嘉湖援賊所必由之路添聚逆黨分紮花
涇港同里等處阻截官軍臣因商令程學啟戈登先圖吳江以斷
賊援六月十一日程學啟督令陽利見等進攻花涇港賊壘該逆
見我軍突至開礮迎擊程學啟等揮兵兜剿以開花礮向賊營轟
擊賊敗回壘中適蘇州援賊數千由葑門出寶帶橋鼓譟而前令
礮船截擊之連放炸礮六十餘次轟倒石城四垛壘賊驚亂戈登
輪船隨到連開大礮悉中要害程學啟督水陸將士一擁而出燒

毀賊船二十餘隻陣斬三四百名當將賊壘攻克吳江之賊數千
蟻擁又至經官軍追斬數百名十三日進攻同里副將張光泰等
將湖口賊營踏破生擒五百餘名潰賊梟水逃遁官軍以槍礮排
擊羈斃溺斃之賊數千蘇州賊酋率二萬餘人礮船一百餘隻由
尹山橋圍攻花涇港石壘程學啟親督水陸各軍往援分鈔賊後
復經副將劉士奇等奮勇夾擊賊卽潰退同里賊營卽時攻克李
恆嵩度官軍攻勦同里之際城賊必不爲備先將北門外賊卡踏
毀並將同里回竄之賊擒斬淨盡十四日程學啟督軍進逼城根
合力攻擊該逆自知不敵開門出降吳江震澤縣城卽於辰刻收
復臣查江震一城當吳越之衝水陸交匯茲旣攻克則嘉湖賊援
可斷且由花涇港直下太湖足以規取蘇垣程學啟等奮勇當先
勦辦尙爲得手又奏丹陽江陰各逆首攻撲楊庫分踞長涇經臣

傳令各營分投勦洗初八日該逆分數十股漸逼楊庫西南北三門忽自退去據降卒云江陰無錫各僞王與護逆意見不合均率眾回遁沙山僅護逆一股盤踞未退是夜唐殿魁派勇偷擊賊館賊多憑河防守我勇由太平橋繞襲其後拏斬多名焚燒賊卡二處賊竄向黃塘而去初九日黃翼升進攻長涇踞賊連踏卡壘十餘座賊退回竹塘青陽港李鶴章令總兵郭松林等分出隊伍於顧山陳市嚴家橋一帶排列長涇之賊時出衝突當經擊退嚴家橋之賊亦經擊敗賊於七里橋設有大卡一座我軍於初九日用槍礮排擊該逆拌命抗拒適王東華督礮船前來併力攻擊轟倒卡牆數丈我軍遂擁而進該逆敗過浮橋斬殺無數賊眾大敗狂奔自相踐踏死者尤多當將賊卡賊壘一律踏平查楊庫長涇一帶竄賊經各營將士冒暑擊退疫病甚多略一休息應卽相機

進圖江陰已函商黃翼升並令劉銘傳李鶴章等穩慎籌辦又奏
據常熟巡船在潁關奪獲偽文數百件臣查閱多係金陵賊目致
蘇杭嘉興各頭目書信內稱洪逆見封偽忠王李秀城爲軍師畱
守金陵因被官軍圍逼調各偽王赴援並求蘇嘉各賊解濟米糧
該城內米價每石十二兩無處購買火藥亦缺等語臣查九洑洲
下關克復則江路已斷商舶不能販運進城金陵賊眾糧少實有
坐困之勢曾國荃鮑超漸圍漸緊可冀得手見在蘇州賊勢亦蹙
吳江復後我軍進步較寬臣已商令戈登程學啟等密爲防備通
飭前路營卡一體查拏嚴斷接濟以杜狡謀 上諭議政王軍機
大臣等江震一城當水路之衝我軍旣已攻克必須固守方足以
搯賊吭而制其命著李鴻章飭令程學啟等仍以穩紮穩進爲主
然後由花涇港直下太湖規取蘇城不可稍存大意楊舍長涇之

賊既經擊退卽應飛飭各營進規江陰惟該營將士冒暑征戰疫病甚多殊深廑念該撫當令黃翼升等妥爲拊循入秋以後疫氣定可漸平卽督令該員弁等妥籌進取無誤事機另片密陳浙關搜獲僞文內稱金陵城內米價昂貴火藥亦缺並調各僞王赴援等情著卽飛咨曾國荃等上緊偪攻並須嚴斷輪船接濟以期早克堅城前已諭令總理各國事務衙門與在京公使妥爲商辦並照會令其飭知各口領事官嚴密查察禁止濟賊糧藥如不服查問仍前接濟卽令師船開礮實力轟擊毋稍姑容見在江南各軍以次得手該撫惟當謀定後動然後攻瑕乘隙自不難節節蕩平同膺懋賞勉之望之將此由六百里諭令知之○諭多隆阿奏覆陳省垣附近回匪情形一摺另片奏遵飭馬德昭赴援甘省等語西安省城附近一二十里外不過時有回匪游騎往復而瑛棨輒

張皇入告聲稱東路回匪直撲省城至回匪數百人突竄蒲城縣屬之興市鎮一帶瑛檄輒稱蒲城被圍甚急陳奏各情已多不實且株守城垣一籌莫展已明降諭旨將瑛檄革職以劉蓉補授陝西巡撫未到任以前著張集馨暫行署理矣惟逆回探知官軍多病日夜撲營雖經多隆阿督率各軍奮勇擊退難保不再來侵犯多隆阿務當振刷精神趕緊經理一俟布置妥協卽行進擣沙河等處賊巢節節掃蕩直達高陵毋落後著鳳翔被困日久不可不星速往援平涼之圍未解豈容膜視著多隆阿迅卽檄飭馬德昭督率所部取道鳳翔實力攻擊迅解城圍卽由鳳翔援救平涼庶不致顧此失彼馬德昭旣去省城戰守事宜多隆阿責無旁貸且據奏稱穆圖善等紮營臨潼與省城近在咫尺多隆阿自應力籌兼顧毋得稍有貽誤致滋咎戾前因漢南兵勇統領乏人節經諭

令駱秉章調派劉蓉赴陝當此陝南軍情萬分喫緊恐事權不屬
呼應不靈是以特授劉蓉爲陝撫該撫身荷厚恩膺茲鉅任自應
感激圖報迅速馳赴漢南整頓諸軍將興漢一帶賊巢剋期攻毀
淨掃妖氛至漢回仇費已深劉蓉到後總當握其要領持平辦理
不可稍涉偏激以副委任劉蓉係駱秉章襄理得力之員茲旣簡
放陝撫則身膺疆寄責有攸歸駱秉章惟當促其迅速赴任所有
四川藩司員缺著駱秉章卽簡賢員一面具奏一面派署以資臂
助張集馨以屢次獲咎之員朝廷棄瑕錄用茲復令暫署撫篆所
有省城一切防剿事宜務與多隆阿穆騰阿和衷商酌期於有濟
毋得存五日京兆之見任令吏治廢弛軍心疲玩致蹈瑛棨覆轍
也將此由六百里諭知多隆阿駱秉章劉蓉並傳諭張集馨知之
○張之萬毛昶熙奏汝軍圍攻張岡賊巢自擒斬逆首張瀾林後

臣毛昶熙親臨前敵激勵將士力圖攻拔臣張之萬亦添派知府尹耕雲與張曜等會籌進取逆首霍光玉仍糾合蕭汶信王暴牙等負隅死守六月十八日張曜等躬率各軍緊逼賊寨設立礮臺晝夜轟擊斃賊無算二十日夜霍逆單身出遁張曜等豫派兵弁尾追立將該逆擒獲張曜等知首逆既擒賊巢必亂當傳令進兵取寨並令陳祿興等挑選精銳分路堵擊張曜策馬當先手刃退縮者數人各勇益奮直逼寨根連放噴筒火箭延燒寨內房屋火光燭天賊眾大亂各勇呼聲震地一擁而登砍倒站牆悍賊爭先入寨該匪拌命苦戰我軍冒火縱擊賊屍枕藉計斃悍賊一千餘名陣斬首惡蕭汶信生擒王暴牙羅淙邦等及張鴻林家屬共一千六百七十餘名其逸出寨外者復經各軍截殺並無一名漏網搜獲張總愚偽印一顆槍礮器械無算救出難民二千餘人立將

堅巢攻拔首逆霍光王暴牙羅淙邦等解赴郡城由臣張之萬
訊明正法查張曜一軍攻克尙店後移得勝之師會合前敵各營
合圍進逼諸將士同心敵愾用奏膚功積年巨患一旦殲滅刻下
汝南全境肅清臣等擬卽簡銳東征埽除毫東餘孽 上諭張岡
旣下汝南一帶肅清自應移兵歸陳以爲防苗剿捻之計張之萬
等所陳兵力疲乏請俟整頓稍有端緒卽行卷甲東征等語固屬
實在情形惟苗逆自陷壽州勢愈鴟張而蒙城被圍日久危如累
卵歸陳一帶若不豫設重兵嚴密扼守萬一該逆乘虛西竄張之
萬等又何以禦之況皖捻餘燼復然柘城太康等處肆擾殆無虛
日尤應迅速剿除以免燎原卽著督飭敖天印尹嘉賓孫之友等
各就派防處所實力扼截毋稍疏虞張之萬等一面將募練各營
趕緊整頓剋期東發以剿爲防不得稍有玩誤歸德一帶本係毛

視熙舊日駐紮之所卽著統領先赴該處鎮撫調度聯絡兵團以壯聲勢至張岡新復人心未定一切善後事宜著張之萬等妥爲籌辦勿稍大意張曜衝鋒陷陣所向有功前由藩司改用總兵實爲用其所長朝廷文武並重毫無歧視該總兵自解官後臨敵慮勝奮勉更倍於前卽是該員秉性忠勇可以永受殊恩之處張之萬等可傳諭張曜令其愈加策勵始終不渝果能殲除苗逆盡掃捻氛則懋賞酬庸正不止一藩司已也將此由六百里諭令知之○革瑛榮任以劉蓉爲陝西巡撫由四川布政使遷未到任前以陝西按察使張集馨暫署○予陝西陣亡總兵官趙旣發朱希廣祭葬世職建祠並副將關行莊等世職附祀○丁未諭議政王軍機大臣等馮子材等奏鎮營連日攻守情形一摺另片奏江北撥到兵勇請歸併鎮營防剿等語南路援賊蠶屯蟻聚圖救金陵鎮營官軍

雖於博洛村水湖等處屢獲勝仗而賊勢正銳總當加意慎重曾國藩所稱金陵長圍未合鎮防緊要不宜分兵遠出應隨時相機進剿丹陽各賊以牽掣之仍可進退裕如等語洞中機宜與歷次諭旨脗合卽著馮子材等妥籌防守仍一面更番出擊使賊無暇分援他處庶金陵之師可期合圍江北存營兵勇旣據馮子材等奏接據都興阿咨稱足敷堵剿所有前撥兵勇二千九百六十名著准其歸併鎮江軍營由馮子材等簡閱調度俾壯聲威各該營向由北臺領餉者仍著悉循其舊其本在南臺領餉各營併著查照上年併軍節餉章程分別釐剔用節冗糜至副將刁經明向辦都興阿營務仍著飭令回營由都興阿等差遣以資得力將此由五百里各諭令知之○戊申諭內閣理藩院奏查明遠支王公之女格格額駙等所食俸銀等件照例應請裁撤開單呈覽並請將

辦理錯誤歷任堂司各官分別議處一摺另片奏莊襄親王之女
見領俸銀俸段應否一併裁撤請旨等語各王公之女格格額駙
等應領俸項乾隆三十六年欽奉 諭旨以宗室日繁世系日遠
若不論近遠視爵授封轉無區別等因交宗人府議奏嗣經議准
以 世祖章皇帝位下子孫所生女照例視該王公之職封授格
格額駙給予俸祿等項其餘王公之女僅給格格額駙虛銜理藩
院從前辦理各王公之女格格額駙未經查明支派均經辦給俸
銀俸段原屬錯誤惟係因支派日繁失於查察尙非有心弊混所
有歷任堂司各官均著從寬免其議處其單開照例應行裁撤之
格格額駙等暨莊襄親王綿課之女見領俸銀等項均著加恩免
其裁撤因念近來宗支蕃衍譜牒愈繁世次愈遠亦應恪遵 成
憲以次量爲變通遞加裁制嗣後各王公之女授封格格額駙著

自高宗純皇帝之子孫以下各王公所生女均作爲近支照例視爵封授格格額駙給予俸祿等項其餘均作爲遠派僅依王公之職封授格格額駙虛銜其下嫁外藩蒙古格格額駙並著一律辦理○諭議政王軍機大臣等張凱嵩奏攻破登龍橋老巢一摺貴縣黃逆股匪併股圍攻馬村仍分踞橋墟等處官軍分路進攻先將頂寨沈嶺橋墟及登龍橋各賊巢次第攻拔勦辦尙屬得手該逆見退踞覃塘經各軍移營追勦著張凱嵩督飭在事文武乘此聲威實力勦辦務將此股賊匪悉數殲除並將首逆斬擒以淨根株容縣范逆自分股占踞蒲塘後又分一股竄入北流縣境雖經知縣王恩培督團擊退難保不去而復來蔣澤春一軍見擬取道下灣先將從逆之羅排等村勦平再行會同鬱林紳團進攻蒲塘著張凱嵩卽飭該道員速行攻拔仍一面進規容縣毋稍疏忽

將此由五百里諭令知之○已酉諭議政王軍機大臣等劉長佑奏親督馬步各軍滾營進紮及按拏直東交界逸匪各摺劉長佑見抵大營河口以天時晴雨無定兼之徧地高禾茂密各軍約期會勦易致彼此互相疑誤見由該督親率步隊與恆齡蘇克金馬隊會合用滾營法步步進紮隨將高禾節節芟刈俟近賊巢再行大舉合圍並已飛飭丁寶楨保德各帶兵勇進紮柳林團附近地方以便屆期督團齊進所籌均尙妥協著卽照所擬趕緊辦理仍須計出萬全不可輕於嘗試致有疏虞沿河口岸之灘上村樓子坡等處匪黨時來窺渡肆擾雖經各將領等疊有斬擒仍須飭令各率兵勇嚴密巡防尖莊大營河口尤須督飭春霖等嚴遏北竄毋令該匪乘間竄突是爲至要直東交界逸匪尙多所獲陳占奎賂洛順孫全仁等處以極刑辦理甚好直東毗連各屬似此伏匿

匪黨恐尙不少仍著飭令各該文武官紳嚴行搜捕一律辦理所
參營總郭勒明阿派隊遲誤且因委參領吉秀屢傳不到情急出
寓未回請旨革拏並將吉秀暫革畱營等語郭勒明阿因吉秀屢
傳不到何至卽自行潛逃且聞郭勒明阿已經投河自盡未知是
否確實其屢傳吉秀不到究竟有無別項情節均應確切查明辦
理所參吉秀暫革畱營未免輕縱委營總吉秀著卽革職拏問交
劉長佑按律究辦務得確情其不服約束之前鋒校木克登布雙
安慶安正奎成連卽照所請一併革職以肅戎行郭勒明阿如果
在逃著卽嚴拏務獲將此由六百里諭令知之○沈葆楨奏自饒
防各軍掃清陶家渡後該逆遁歸石門並分紮雞公包等處劉典
督軍分路進攻石門該逆三面受敵翻山而遁當將賊壘悉數平
毀劉典以士卒連日血戰量予休息再圖會剿初一日參將韓進

春探聞黃老虎從都昌潛出金門遂率韓字等營徑撲鐵門賊陣不動初二日該逆冒雨由謝家灘潛渡我軍倉皇應敵拒之河干驟雨淋溼藥繩槍礮難以施放該逆復從上下游分涉而來襲我後路我軍營壘未成以致挫退韓進春以親軍數百人斷賊之後乃收集各隊回紮小港該逆見官軍屹然山立仍竄歸鐵門饒防安堵如常臣查韓進春恃勝而驕輕進無備致爲該逆所乘臣嚴飭該參將振刷精神力加整頓再行約會進取外相應請旨將臣標中軍參將韓進春暫行革職畱營以觀後效並請旨將臣交部議處又奏該逆自陶家渡石門敗後以饒防未易窺伺乃以僞愛王踞都境僞感王踞湖境僞跟王踞彭境堵逆等來往於都湖之間擄奪民船編竹作筏希圖偷渡而堵逆之弟黃汶丙又嗾譚星劉官方分途窺伺祁西使我首尾不能相顧督糧道段起以桃樹

嶺空虛移紮狀元港初七日該逆分股攻桃樹嶺及打杵汊團紳汪爾昌率勇抵禦斃賊頗多適段起督勇至桃樹嶺都司郭開連督勇至打杵汊會合兜擊賊乃敗潰出嶺其由都湖港汊偷渡者均經副將丁義方等水師擊退其零星各股遁出江境爲青陽防兵擊敗回竄彭澤之外江戰船調防他處該縣知縣趙宗耀僅以練勇數百嬰城固守臣檄楊友勝分戰船五號以爲之援江忠義李榕於初七初十等日會剿湖口之賊未能得手都昌水陸各營雕剿時獲勝仗而賊兵日益乞援之書雪片而至臣於饒防抽調忠勇軍赴之自吳城下至南康遙望對岸徹夜火光燭天民心震恐經劉于濤飭駐饒之江軍移緩就急沿湖布置大局尙可無慮惟自湖口以東延袤數百里焚殺搶擄之慘耳不忍聞被難紳民來省上書促戰殆無虛日而各營奔馳於炎風烈日之中病者十

幾六七餉輒逾期皆緣臣調度無方所致惟有諄飭各將領隨時相機辦理以期仰慰宸廑上諭劉典以士卒連日血戰量予

休息再圖會剿著沈葆楨飭令劉典將各軍妥爲拊循暫息勞乏仍卽乘此聲威復圖攻取據奏賊兵日益自係由太平石埭祁門建德一帶竄入若令蔓延江省全局必致掣動而分防兵力亦恐不支卽著曾國藩左宗棠迅檄徽甯等處得力防軍分路追躡痛加剿洗並會同江省官兵兩面夾擊務將圖竄江西之賊殲除淨盡俾江南浙江諸路官軍後路均臻穩固方爲妥善將此由六百里各諭令知之○庚戌申禁各部院積壓案件○王子曾國藩奏近日探報僞忠王侍王均隨洪逆堅守金陵船運蘇州之糧接濟老巢曾國荃一軍自五月十五十八等日攻破金陵南城角長干橋一壘二卡後圍偏如常別無戰事鮑超至鍾山築營將竣本擬

移紮孝陵衛旋因自染暑瘧又以軍中疾疫大作死亡相屬恐前
敵爲賊所乘遂平毀鍾山營基仍往神策門沿江一帶金陵暫難
合圍臣亦以江西未靖皖南方棘恐鮑超須調勦上游不敢令其
遽爾合圍也蕪湖甯國南陵涇縣各城金柱關灣沚清戈江各隘
雖抽調何紹彩西河一軍而水陸防守幸均完固僞輔王楊七麻
等股在東水陽新河莊結卡踞守亦未敢伺隙內犯二十至二十
六等日甯國守將劉松山會約涇縣守將易開俊勦賊於黃村等
處四戰四捷朱品隆亦自青陽會勦於木竹潭等處獲勝三次斃
賊極多前據接獲僞文忠酋欲調黃李古賴各賊回援金陵近則
並無其事古賴劉藍等逆仍在太石涇旌之交黃李等逆則麇聚
於湖口都鄙一帶數月以來江西官軍與左宗棠派援之師苦戰
苦守屢獲勝仗景鎮鄱陽之賊次第退竄沈葆楨又咨調江忠義

專勦湖口滿擬卽日全境肅清六月初二日韓進春在洋塘挫潰
兇賊復張目下賊勢趨重湖口一路六月十七日猛撲江忠義堅
山營寨李榕部將陳由立援勦獲勝旋以追賊致挫十九二十三
等日復來堅山圍營攻撲甚猛江忠義雖係宿將而所部老勇較
少新募居多李榕則全係新立之軍未經大敵殊可危慮由湖口
下至彭澤馬頭東流上至屏峯南康都昌濱江濱湖一片逆氛臣
見咨商彭玉麟多帶礮船親赴湖口援勦江西諭旨所示廓清江
境然後併力皖南規取金陵誠爲確不可易之理卽當欽遵辦理
上諭議政王軍機大臣等黃李等逆麇聚於湖口都鄱一帶江
西官軍與左宗棠派援之師苦戰苦守屢獲勝仗景鎮鄱陽之賊
次第退竄因韓進春在洋塘挫潰賊復趨重湖口由湖口下至彭
澤馬當東流上至屏峯南康都昌濱江濱湖一片逆氛曾國藩咨

商彭玉麟多帶礮船親赴湖口援剿見在江忠義所部老勇較少
李榕新立之軍未經大敵而該逆愈聚愈眾勢甚兇悍自應添撥
勁旅以資攻剿著曾國藩咨會彭玉麟督帶礮船迅速前赴湖口
會同江西省官軍實力進攻並著沈葆楨督同江忠義李榕等軍穩
紮穩進節節掃蕩務將該匪聚殲廓清江境庶可移師併力皖南
爲規取金陵之計苗逆陷壽州後勢甚猖獗前諭彭玉麟楊岳斌
趕赴臨淮會同進剿見在彭玉麟赴援江西楊岳斌未識何時可
以抵淮著曾國藩迅催楊岳斌水師星速駛赴臨淮藉資援救唐
訓方仍當就見有兵力妥籌守禦以待援師毋稍鬆勁致誤戎機
鮑超自染暑瘧並軍中疾疫大作死亡相屬朝廷甚深廕繫曾國
藩以江西未靖皖南方棘恐鮑超須調剿上游不令遽圍金陵所
籌甚是該提督一軍應調赴何處策應之處卽著曾國藩相機辦

理前諭吳棠令黃開榜水師赴淮援剿並飭姚廣武速將徐西各匪剿除卽回宿境著吳棠仍遵前旨催令黃開榜帶領水師趕緊駛赴臨淮並催姚廣武將徐西之匪迅速掃蕩卽行回宿以通蒙城糧道毋令頓兵徐西日久無功是爲至要將此由六百里各諭令知之○諭閻敬銘奏按捕淄川餘匪截殺殆盡見擬移軍清博一帶以遏北竄一摺淄川縣城克復先由淄城竄出之賊經官兵追殺多名竄至白蓮池東門外之賊復經按捕無遺其竄至新泰境土門一帶賊匪均經按殺淨盡地方一律肅清辦理尙屬認真該署撫所籌善後各事均照所議辦理宋憬詩一股前據劉長佑奏到已移營進逼該匪等被剿窮蹙難保不乘隙奔竄東昌濱臨運河清平博平等境之梁家淺魏家灣等處均係河口要隘儻該逆乘虛北竄擾及直境尤爲可慮該署撫見擬回省稍理地方要

務卽親自督軍至清博一帶駐防著卽趕緊料理諸務前往駐紮
遏賊北竄之路總兵保德臬司丁寶楨二員見紮堂邑之六官莊
逼近賊巢兵力甚單該署撫已派都司楊通廉等勇隊一千五百
名交其統帶著飭令保德等懷遵屢次所奉諭旨聽候劉長佑調
遣以一事權將此由五百里諭令知之○諭穆騰阿瑛榮奏疏通
道路情形請飭德興阿赴省並醴泉被圍漢郡接仗失利石泉兩
次擊賊及漢陰獲勝各摺片逆回攻撲南關馬德昭督隊追剿因
馬驚被跌受傷甚重著賞假二十日起緊調理見在省外匪蹤出
沒無常防剿均關緊要曹克忠一人勢難兼顧著多隆阿卽飭德
興阿輕騎馳赴省城接統馬德昭之軍實力剿辦其馳援鳳翔一
節或另派得力大員或俟馬德昭傷愈後再行統兵前往著多隆
阿斟酌情形辦理同州大營後路並著多隆阿另派委員接統德

興阿所帶之兵以便德興阿馳赴省垣毋稍遲誤醴泉被匪圍攻勢甚危急著穆騰阿張集馨嚴飭馬陞一軍就近由咸陽星夜馳往速解城圍並將興平等處賊匪一律掃蕩瑛棨狃於撫議幾誤大局張集馨接署撫篆務宜力矯前失鼓勵將士嚴密堵剿不可爲奸回馬百齡所惑並須與多隆阿和衷共濟聯絡聲勢以期肅清東路王夢齡見抵武功所部兵勇止三百餘名其數過單著張集馨卽飭畱駐鄠縣之川勇五百名歸併王夢齡統帶並嚴飭該副將進抵歧山速解城圍如查有逗遛觀望情形卽著以軍法從事毋稍姑息竄斗二山賊匪經官軍擊敗後竄赴西鄉全股趨赴石泉漢陰攻撲縣廳各城均經該地方官先後督團擊敗見在該逆糧米甚缺力圖占踞汪家寨該處地廣糧多路通川陝楚三省設被匪眾盤踞爲患甚巨著張集馨督飭該地方官鼓勵鄉團實

力勦洗並力籌堅壁清野之法使該逆無糧可據自可易於解散至漢陰一帶逼近興安官文嚴樹森務當督飭梁作楫一軍迎頭截勦毋令下竄郡城漢中被圍日久情形危迫異常著駱秉章速催劉蓉馳往漢南統率諸軍力解城圍無再遲延張由庚已駐軍川陝邊境經署漢中守楊光澍兩次親詣該營求援輒敢擁兵不救是否各軍部署未齊抑係藉詞推諉著劉蓉確切查明從嚴參辦楊光澍因張由庚延不赴援憤激出城帶兵勦賊孤軍被圍失利與輕進致敗者有間並著免其議處將此由六百里諭知官文嚴樹森多隆阿穆騰阿駱秉章劉蓉並傳諭張集馨知之○飭湖北山西迅解多隆阿軍餉○癸丑以近畿盜匪溷迹申諭順天府直隸總督嚴緝○甲寅唐訓方奏臨淮官軍於六月二十五日至七月初一等日迎勦賊匪疊獲勝仗而蒙城之圍未解昨接姚廣

武稟報該總兵於二十三日回宿適遇擒首趙克元等帶領馬隊百餘名向東竄突我軍分投衝擊斃賊甚多登時擊退而趙克元仍盤踞宋家圩抗拒見在趕緊力圖攻取以清後路並於二十日將各處協解蒙城餉銀護送至侯家圩設法轉解前進仍擬與小澗各營會合夾攻先清餉道再圖節節進剿以解蒙圍等語查蒙城自馬新貽擒獲逆黨胡得靈後高鑪集迪南諸圩反正者二十餘處各出練丁協助官軍與苗逆接仗惟糧路仍未疏通苗逆於狼山一帶連紮十七營賊眾我寡賊逸我勞餉銀能否運到尙未可必馬新貽亦稟稱見令王才秀穩紮蒙城而自率所部及徐登喜奮勇四百名移紮小澗密商姚廣武自侯圩前後夾攻與賊決戰等語情形仍屬十分危迫曾國藩所派之何紹彩一軍已於初三日到營數僅二千復因在甯國等處染患時疫見飭趕緊調養

就痊以收實效至壽城踞賊如故查霍邱之溜子口爲該逆運道由六至壽之迎河集爲進剿正陽之路而老廟集復爲壽南扼要之區臣與曾國藩往返函商見以蔣凝學進紮溜子口周寬世一軍分紮六安州迎河集兩處毛有銘進紮老廟集均俟辦有端倪隨時奏報上諭議政王軍機大臣等蒙城被圍日久糧運斷絕見在就近可以往援者惟姚廣武一軍何得因趙克沅等百餘捻匪輒將兵力牽掣一隅遂置大局於不顧馬新貽見令王才秀穩駐蒙城而自率所部移屯小澗密商姚廣武自侯圩前後夾攻事機已迫萬不可再有遲誤卽著唐訓方檄調姚廣武等迅速進兵疏通蒙城餉道吳棠仍一面嚴飭該員鼓勇前進毋得託詞防捻跋前疐後致誤戎機自干重咎黃開榜水師疊經諭令駛赴臨淮至今尙未奏報啟程並著吳棠迅催前往毋得稍有稽遲昨因彭

玉麟赴援江西諭令曾國藩迅催楊岳斌督率水師駛赴臨淮藉資援救此時苗逆勢極猖獗仍著曾國藩遵旨嚴催毋稍遲玩唐訓方仍就見有兵力妥籌守禦以待援師並飛催蔣凝學周寬世毛有銘等軍迅速進紮溜子口等處約期會剿不可鬆勁另片奏遵查李南華見在蒙城助剿屢有擒斬等語李南華打仗尙爲勇敢且與苗逆爲仇唐訓方務當隨時駕馭籠絡俾爲我用將此由六百里各諭令知之○丙辰 慈安皇太后聖壽節停止 升慈甯宮○諭內閣駱秉章奏請將生擒逆首石達開案內尤爲出力之士千戶懇恩改獎等語緩帶密土千戶嶺承恩松林地土千戶王應元前經駱秉章奏請鼓勵均經降旨加恩賞給宣撫司職銜並分別給予勇號副將銜茲據奏稱該土千戶皆隸印部宣撫司統轄加以宣撫司職銜於體制究有未協等語嶺承恩著改給土

遊擊世職頒換綬帶密土遊擊印信仍賞給桓勇巴圖魯名號王
應元著改給土都司世職頒換松林地土都司印信仍賞加副將
銜均著由部給發號紙准其子孫承襲仍歸印部宣撫司統轄以
示區別而資感奮○諭議政王軍機大臣等駱秉章奏添派楚軍
馳赴陝南會剿一摺據奏鄂省梁作楫一軍雖赴興安止能扼要
駐守蜀省所派桂字嚮導兩軍進規漢南兵力尙單見復擬派總
兵何勝必蕭慶高帥湘果中右兩軍取道南江一路繼進兵力旣
厚可立解漢南之圍等語籌辦甚屬合宜卽著劉蓉迅速馳往漢
南統率諸軍進剿毋稍遲延何勝必蕭慶高所部及援剿陝南各
軍均歸調遣毛震壽在陝久不得力且有被參之案茲據駱秉章
奏稱該藩司雖不能迅殄逆氛而力守城固尙能與賊久持是非
一無足取者著劉蓉於到陝後察看其人是否可用並其兵勇應

否簡汰之處迅速具奏寶斗二山竄匪全行趨赴石泉漢陰攻撲縣廳各城梁作楫一軍應令迅赴漢陰攔頭截擊劉蓉督率各軍力解漢中之圍仍須兼籌截剿漢陰之賊勿令得與郡城賊匪竄合川軍口糧既由川省籌發以後餉需駱秉章必能源源接濟毋令缺乏也將此由六百里各諭令知之○諭徐宗幹奏臺灣軍務情形一摺副將曾元福自進紮白沙坑後設計攻破大岸頭各莊竹園並將大埔八卦山等處賊巢盡行焚毀正可乘勝進取惟吳鴻源以冒暑督戰染疫暫回嘉城徐宗幹因統率乏人檄令曾元福由間道直趨嘉義接署水師提督著卽飭令曾元福與委署北路協副將湯得陞合力攻剿先通南北兩路仍令曾玉明激勵官兵聯絡義勇迅克彰城毋稍遲緩臺灣道洪毓琛所出之缺徐宗幹見委知府陳懋烈暫署惟提督道員均係署任見當喫緊之時

驟易統率之人一切攻取機宜尤應加意慎重徐宗幹務當實力
嚴催責令認真勦洗迅掃賊氛毋稍鬆勁並著左宗棠隨時督催
一切軍情咨會徐宗幹妥籌辦理將此由六百里各諭令知之○
予福建軍營病故道員洪毓琛祭葬卹廕加等○丁巳李鴻章奏
探聞嘉興府逆首僞榮王廖發受領水陸賊眾數萬於十六日直
撲吳江縣之南門勢甚洶湧程學啟督軍登陴用礮對轟一面挑
派洋槍隊千人調集礮船二十隻出城迎勦該逆見我軍遽出悉
力來撲鏖戰良久互有損傷副將何安泰等乃由城左小路鈔襲
賊後都司彭玉貴等開礮轟擊謝梁鎮等礮船復攔腰截勦賊陣
大亂程學啟督洋槍隊奮力猛衝賊反戈狂奔自相踐踏我軍追
殺二十餘里將至平望奪獲賊礮十二號擒斬悍賊二千餘名程
學啟相度形勢該城南通嘉興北接蘇州西連太湖面面皆爲賊

竄因於城南之萬頃橋扼紮兩壘令遊擊阮炳福守之以當嘉興
來路城西北之夾浦口扼紮兩壘令總兵陳有昇陸師與總兵張
光泰淮揚水師守之以當蘇州來路又令副將何安泰督同遊擊
張志邦帶兩營駐守城中相機策應多儲米糧子藥爲死守計程
學啟於二十日仍回灘亭老營兼顧由崑入蘇之路二十一二日
以後蘇嘉各處大股四出狂竄互延數十里連撲夾浦營盤均經
我軍擊退該逆有開花礮壘次向營轟打幸其礮甚小尙能儘力
抵禦臣見商令各國領事出示嚴禁不准流氓接濟賊匪至崑蘇
吳江之交百里間河湖交錯師船甚單亟盼李朝斌太湖水師下
駛以資分布聞尙阻風海門不能徑渡見飭劉銘傳李鶴章等進
攻江陰劉秉璋潘鼎新等進圖嘉善冀可稍分賊勢 上諭議政
王軍機大臣等荷蘭派使臣礬姓立約乘駕輪船赴京見先至工

海欲請該撫轉奏情詞尙爲恭順見在該撫照覆該使先令其前來面商一切著剴切開導申明比國成案將換約事宜卽由該撫在上海妥爲辦理蘇嘉各處大股四出狂竄連撲夾浦營盤均經我軍擊退惟該逆內有洋人施放開花礮屢次向營轟打白齊文又先帶流氓洋匪二百餘人投入蘇賊雖我軍尙能抵禦總須設法斷其接濟方可制賊死命卽著李鴻章商令英法美各領事出示嚴禁不准各國流民偷入濟匪並准前路各營卡查拏捆辦至各國輪船本准其入江往來該洋人惟利是視難保其不暗中濟匪所有水路各要隘遇有輪船出入應如何設法禁止斷賊接濟之處著李鴻章咨照左宗棠會同妥商辦理崑蘇吳江之交師船甚單並著催令李朝斌統帶水師迅速下駛以利攻剿將此由六百里諭令知之○諭張之萬毛昶熙奏整頓兵勇分防各路一摺

豫省官軍攻克張岡後毛昶熙馳回汝甯與張之萬整頓兵勇裁汰疲弱另行挑選並派陳祿興等四營與毛昶熙所部馬隊陸續馳赴歸德堵剿辜捻毛昶熙見因辜捻被陳郡各營扼擊回竄宋屬喫重復督總兵趙鴻舉等四營馳赴歸德並將李世玉等軍歸併調遣諸軍更有所統率著卽申明號令嚴密布置並著越境進攻以剿爲防不可畫疆自守其豫勝各營及參將尹嘉賓等馬步各隊均歸張曜統帶著張之萬等卽飭張曜速行進紮陳郡並與袁甲三會籌妥商聯絡鄉團節節進攻以期會合楚軍兼施防剿張之萬見紮許州居中策應當此防剿喫緊之際斷不可遽回汴省息縣一帶尙有伏莽汝甯各屬土匪恐亦未能遽盡張之萬等見畱副將李殿元駐軍搜捕並令劉鴻增等軍分駐固始正息尙恐兵力單薄著張之萬卽飭令蒯賀蓀督率團勇協力剿辦與官

軍聯絡聲勢以期掃蕩餘氛毋稍玩誤將此由六百里各諭令知之○諭晏端書黃贊湯奏提臣督師高郡進剿事宜並陳各路軍情一招廣東高州軍務日久未能得手亟應力加整頓嚴督各軍及各該地方文武實力堵剿崑壽在粵年久於地方情形自應熟悉此次督辦高州賊匪尤屬責無旁貸務須凜雪精神力圖振作於各帶兵文武嚴加督率將信宜等處股匪迅速攻擣痛除逆燄以靖地方晏端書既權督篆亦不得存五日京兆之見致地方軍務諸多廢弛毛鴻賓郭嵩燾行抵新任即將地方應辦事宜逐一整理軍營文武及各該地方員弁兵團均著嚴加整飭以資防剿並督飭吳昌壽將廣海寨城迅圖攻克毋任客匪久踞信宜之賊本與廣西容岑賊窟相連晏端書奏據劉坤一稟報貴縣克復道員蔣澤春一軍可由鬱林進取容岑與東省官軍會合夾擊與前

張凱嵩所奏潯州等處情形大略相同如果西省官軍能卽進取容岑自當速與崑壽所督高州各軍東西合力以收夾擊之效著張凱嵩督飭劉坤一蔣澤春實力辦理將東西兩省毗連各屬股匪次第肅清不得苟且粉飾致令有名無實自干罪戾前諭派令道員唐啟蔭前赴高州幫同崑壽籌辦剿賊該員籍隸廣西於兩省軍情賊勢自應確有所見並著崑壽與之妥籌進剿一切機宜以資得力將此由六百里各諭令知之○諭崇實駱秉章奏遵飭田興恕回黔並陳在川查辦窒礙情形一招與疊次諭旨用意頗爲脗合張亮基抵黔後將田興恕舊部欠餉酌量散給軍心自己樂爲之用且自三月抵黔接署巡撫提督兩篆斧柯在手拊循駕馭已近半年豈尙慮該革員借兵挾制致起變端其所部兵勇二千本由黔省帶往自不難由黔省收其兵柄使就範圍至該革員

應查各案本係在黔之事一切卷宗左證自應就近查提若令赴川該革員必恃事無左據堅不承認川省豈能以一面之詞遽爲定讞往返咨查更屬耽延時日於外國交涉事件豈宜日久稽延著勞崇光張亮基迅卽懷遵前旨將田興恕撤回黔省收其所部所有應訊各案速爲辦結毋得意存諉卸致負委任將此由六百里各諭令知之○戊午諭內閣勞崇光張亮基奏請將劣員革職審辦等語湖南補用知縣張茂萱卽張心培補用同知直隸州知州捐升道員謝葆齡以幕友濫膺保舉攬權怙勢劣蹟昭著田興恕被參各款皆由該員等唆使蒙蔽居多前經畏罪潛逃見據該督等訪獲審訊張茂萱卽張心培謝葆齡均著先行革職交勞崇光張亮基嚴行審訊按律懲辦○唐訓方奏苗逆詭謀百出專以阻截糧路爲能事聲東擊西尤其長技所以在狼山紮營十餘座

者固爲阻截蒙城糧運亦欲使我分兵救援蒙城則臨淮兵力愈單而彼得遂其狡謀也臣故令姚廣武馬新貽英翰諸軍內外夾擊以通小澗之路而臨淮各營堅壁不動該逆增調悍賊分由黑窯上洪兩路包鈔前敵諸營經張得勝等併力擊敗該逆一面增築營壘悉力相持一面分兵由曹老集攻撲王莊營壘意欲包圍臣營後路該處僅遊擊李坤一營在彼屯紮該逆固藐視之意謂一鼓可下當經臣先期諜知密抽臨淮老營精銳千人乘夜設伏附近地方逆眾驟至伏兵突發李坤亦開營出戰內外夾攻殲戮多名餘眾踉蹌奔遁自是不敢窺伺王莊遂抽調蒙城一帶之賊專於淮河兩岸力圖鈔襲七月初三日賊由懷遠上游渡淮南岸會合上洪壘賊撲我上洪新訓前左兩營普承堯乘其前甫成列後猶未濟亟帶親兵從塗山背後下擊復派哨勇由山右包鈔用

山石亂擊斃賊甚多乘勢壓下其圍立解是夜賊一以水隊暗襲南岸水軍經龔文林擊退一以旱隊由北岸迤東而來攻撲朱淮森營壘亦經朱淮森擊卻之初五日苗逆親率大股約二萬餘人陣於黑窯後路而於陣後河岸搶築營壘張得勝急令各營堅守並商普承堯自南岸派隊飛渡助戰相持逾時賊氣漸餒向聰得率馬勇馳擊其後普承堯率軍連用劈山礮轟之賊勢披靡朱淮森分兵兩翼鈔出迎戰龔文林等復移戰舳巨礮轟擊賊遂大敗歸壘計此次殺賊千餘人奪獲旗幟器械無算前敵差能穩固然七里廟河岸該逆已添三壘分踞矣先是臣未得捷報深恐難支因於初六日派駐臨之遊擊何有能等督隊馳赴前敵以資戰守行次北岸小蚌埠經張得勝密約進剿河沿新築賊壘與前敵各營爲夾攻勢連環轟擊自辰至酉始填濠越牆而入連踏三壘計

斃賊約千五六百人並生擒賊目李三訊明正法計自前月以來
逆壘增至三十餘座賊眾愈聚愈多忽分忽合竟莫測其數之多
寡兼以附近民圩日遭裹脅各營兵勇祇有此數臣惟有督飭各
軍力支危局總期速靖狂氛早紓宸廑至蒙城一帶賊眾既抽
赴懷遠想彼處情形或可稍鬆俟得有確報再行馳奏上諭議
政王軍機大臣等逆匪愈聚愈眾民圩日遭裹脅而各營兵勇止
有此數日久相持終恐情見勢詘著曾國藩吳棠嚴催丁泗濱及
前調黃開榜師船迅速駛赴臨淮會合夾擊毋得稍有遷延致干
重咎楊岳斌黃翼升所部水師並著曾國藩嚴催赴臨會剿毋稍
延誤至蒙城一帶賊眾既抽赴懷遠則彼處情形或可稍鬆著吳
棠唐訓方嚴飭姚廣武馬新貽英翰諸軍內外夾擊立解城圍儻
姚廣武仍敢託詞防捻畏葸不前致失此可乘之機必將該員從

重治罪唐訓方另片奏李世忠遣副將朱元興等帶兵千餘來臨屯紮並添礮船數十隻停泊五河聲稱係稟請曾國藩會剿苗逆等語李世忠所部久未聞有與賊接仗之事此次忽遣兵弁赴臨聲言助剿其意究欲何爲見雖據唐訓方奏悉心防範而屯兵肘腋究恐滋生事端著曾國藩設法將伊派出之兵調往他處或令赴江浦一帶防堵俾免臨淮各營疑慮方爲妥善將此由六百里各諭令知之○予貴州陣亡道員趙國澍參將蒲友登祭葬世職○己未沈葆楨奏自提督江忠義一軍進紮堅山該逆黃老虎由都昌之蔡家嶺悉眾來爭六月十七日江忠義密令各營出六成隊依堅山分道設伏並飭江上喜江忠倬督率隊伍防其由梧桐嶺襲我馬影橋老營一面函商李榕會剿該逆偏營而陣橫互十餘里我軍分路攻剿酣戰兩時斃賊數百名賊不少卻江忠義督

同江忠華揮令馬隊出擣中堅黃仁遺等怒馬疾呼而進賊始披
靡我軍乘勝追殺該逆復敢抗拒經我軍殺斃七八百名李榕分
軍援剿亦多斬獲總兵陳由立窮追遇伏小有挫折江忠義以該
逆不得逞於前必襲我後當飭堅山各營如賊來犯各自堅守毋
輕出戰十九日該逆果以大股伏於張天社酬山一帶而以小股
於堅山之前挑戰自辰至午見我軍不動乃以四千人徑撲新左
翼營壘其大股三面合圍堅山各營我軍俟其近濠始放槍礮斃
賊千計賊仍不退前鋒後勁兩營地尤衝要賊分股牽掣各壘悉
銳攻撲兩營逆酋黃老虎吹號揮眾營官黃仁遺調槍隊擊之該
逆倒地羣賊昇之而遁餘悉鼠竄查該逆爲悍賊渠魁既受重創
羣逆自必喪膽臣見飭劉典會督饒防各軍步步進逼合力兜剿
以期殲除醜類綏靖邊疆又奏據統帶老湘營道員王文瑞稟稱

古江二逆踞安徽黟縣石太地方於六月十六夜竄至郭村十七日由羊棧竄入黟縣經該道乘其喘息未定擊之知府朱明亮等分道會剿十八日行距黟城數里部勒甫定城賊傾巢而出我軍環施槍礮鏖戰逾時賊猶拌死抵禦熊常富等從後鈔殺賊乃驚潰喻勝榮等乘勝衝入南門搜殺百餘賊當將城池克復喻勝榮知左路賊勢較重馳往應援見賊堅伏濠內槍礮擊之不動乃同丁長勝等率步隊踰濠攀牆而上立斬悍賊數十名賊遂棄壘而遁鄧榮達等涉過小河截其歸路各軍兜殺斃賊五六百名援賊分道而至我軍整陣以待丁長勝等左右鈔擊各軍齊進賊乃大敗我軍追出羊棧嶺斬其尾隊百餘名餘匪悉向石太而遁黟境肅清查該逆回竄黟城圖竄江境王文瑞乘機掃蕩具見調度有方臣惟有檄飭該道督率各軍奮力追剿以遏賊匪窺竄之路

又奏日來悍賊盡趨湖口祐逆李遠繼實未陣斃仍隨黃老虎於文橋以拒江忠義一軍自十九日一戰羣逆膽落屢次挑之伏匿不出其擾都昌之賊疊被官軍襲勦愈遁愈遠惟蔡家嶺等處尙堅紮老營悍賊守之以固文橋後路黔境旣靖劉典可無東顧之憂已約會席寶田等進紮石門梅源橋洋塘等處擬先攻青山橋掣賊之後以期迅掃逆氛上諭議政王軍機大臣等石太古江二逆竄入黔縣經王文瑞派隊襲擊克復城池仍向石太遁去仍著督飭該道員奮力追擊毋令竄回江境黃李等逆屬聚於湖口都鄙一帶自江忠義進紮堅山扼要設伏李榕亦分軍援勦雖陳由立遇伏官軍小有損折而黃逆中槍倒地已受重創羣賊亦必膽落著督飭劉典會督饒防諸軍步步進逼合力兜勦湖口雖疊獲勝仗黃李各逆仍堅踞文橋都昌之賊雖敗遁較遠而蔡家嶺

等處尙有悍賊堅守老巢以固文橋後路見在黟縣旣清劉典可
無東顧之慮卽著會同席寶田等軍進紮石門梅源橋等處乘勢
繞出賊後分路包鈔迅掃逆氛以顧江省全局花旗股匪竄擾彭
澤該縣令等極力固守兵勇太單日久究恐不支卽著沈葆楨飭
令在防諸軍分兵救援仍督令該縣令等策勵團勇實力堅守以
保危城將此由六百里諭令知之○常清奏俄羅斯屢徧邊卡茲
復闖赴博羅胡吉爾卡倫經索倫總管等將其攔回俄人竟施放
大礮見在大隊退至科斯莫鑾地方集有五六百人已派領隊大
臣托克托柰管帶官兵五百名前往堵禦如該國兵隊退回卽飭
令托克托柰等整頓隊伍嚴守卡倫報聞○庚申僧格林沁國瑞
奏臣等由淄川啟程於七月初五日行抵鄒縣白蓮池查白蓮池
教匪自黃國瑞舒通額等由東西兩路攻進賊巢會合搜剿擒斬

多名餘匪竄上紅山該處懸崖陡壁山頂寬敞察其人數尙有二萬餘眾所恃豫積糧米倚險抗拒臣等當令舒通額等嚴加防範以杜偷竄並令署運司恩錫等將遠處營壘移紮西南紅山腳下以防奔突臣等駐紮土旺迤西數里之來富莊地方初八初九兩日督飭各營環山列隊用礮轟擊該逆拌死抵拒礮石如雨我軍仍奮勇爭先攀藤附葛意圖搶攻該逆用巨石自嶺墮下各營兵勇受傷數百名當卽撤隊見於紅山對面平嶺之上添築營壘兩座派參將李其昌等各帶勇隊駐紮並將礮位安設營內添兵保護以便晝夜轟擊惟山徑叢雜澗壑縱橫賊之竄路分歧防範實有難周見飭舒通額等統帶馬隊巡邏儻有奔竄卽可跟蹤追剿至淄川逃出捻棍會匪千餘名經托倫布等帶領馬隊跟蹤追剿敗於田莊餘匪數百名翻山奔竄該侍衛等追至臨朐縣龍岡及

曾家岡等處復斃賊百餘名敗匪僅贖二百餘名逃竄入山旋隨寶泉固匪首呂從學等赴黃國瑞營中懇請投誠效力贖罪經該總兵驗明准投見在此項人眾卽飭歸黃國瑞管帶屢次隨同進攻尙能勇往再據佐領訥木津稟稱擒首李大箇子等見在岳家集游弋因知我隊已抵永城情願投誠當經臣等以李大箇子係屬漏網捻逆情急來投殊不可靠已札飭訥木津將該擒首是否真心投誠抑或鼠首兩端據實稟覆再行覈辦又奏據總兵姚廣武稟稱該總兵於六月二十九日馳抵侯圩將運蒙糧餉軍火送至小澗集交臬司馬新貽轉運蒙城並與馬新貽籌商進剿必須剿除狼山賊壘糧路方可暢行該總兵當與英翰籌議於蔡寨以西扼要紮營一面分兵繞赴狼山東路七月初四五等日我軍出隊均有斬擒逆勢不支初五日夜將狼山踞壘十餘座全行撤退

該總兵督隊馳勦適蒙軍由山南至合力夾擊殲賊不少該逆狂奔而回該總兵以東西盡屬賊巢未便深追而從逆之趙王二圩均出乞降旋探該逆果竄至蒙城城外渦河南北築壘初七日該總兵督隊趨抵蒙城次早會同蒙軍分路鈔擊擒斬多名復折向西北攻劉家圩外圩之賊盡被殲斃因該逆堅拒急切未下遂由檀城集折回一路經過各圩紛紛乞降蒙城糧路見已疏暢各等情臣等一俟白蓮池教匪掃滅後卽當撥兵赴皖會同各軍合力夾擊仍俟直東一律肅清臣等再行督帶馬步全軍南下旣無回顧之慮卽可專意進勦 上諭議政王軍機大臣等白蓮池教匪被殲掃打難保不窮而思竄山徑叢雜防範最宜周密該大臣務須嚴爲布置勿令乘間出竄惟山勢險峻散漫旣難仰攻又恐非重圍所能困總宜尋覓機會使逆巢有內應之賊庶幾一鼓可下

淄川逸匪被官軍追剿窮蹙赴黃國瑞軍營投誠該逆狼子野心
反覆無常難保不與教匪暗通消息著僧格林沁督飭黃國瑞隨
時防範如查有反覆情形卽速殲除毋稍姑息捻首李大箇子等
是否真心悔罪亦須令馬新貽英翰等詳加體察斟酌辦理蒙城
所屬頂山逆壘十餘座既經撤退趙王兩圩均經乞降總兵姚廣
武復將附近投誠各圩收撫蒙城糧路見已疏通著僧格林沁卽
嚴札該總兵奮力進抵蒙城會合馬新貽英翰等軍內外進攻迅
解城圍毋許藉詞逗遛致干重咎昨據唐訓方奏稱苗逆親督黨
與二萬餘人於臨淮南北兩岸添紮營壘官軍日有傷亡而逆黨
日加增益情勢甚爲危迫僧格林沁務當迅將紅山股匪剿除淨
盡以便移師皖省埽蕩苗氛毋稍延緩將此由六百里諭令知之
○諭聞敬銘奏由淄回省督軍馳赴清博一帶因阻水未能速進

並楚勇到東一摺據稱由山東省城前赴清平博平兩路水勢寬
深橋梁沈沒閭敬銘前派赴堂邑之三營均在齊河一帶阻水亟
應設法催趲以期無誤軍行著該署撫酌度情形飭令該營迅速
由大清河水路挽行毋再遷延並著嚴飭各該州縣逐段疏消或
於水淺處插標引路或覓船紮筏分起渡送以便各該營將士得
以暢行無滯東昌勦匪正值喫緊亟須該撫前往統率著閭敬銘
俟水勢稍減卽行馳赴清博一帶妥爲調度遊擊王心安等所募
楚勇三千已陸續到齊旣據該撫奏稱總兵保德等在堂邑勦辦
宋逆並運河東岸防軍兵力尙嫌單薄應如何將新到楚勇酌量
派往以利攻剿之處卽著閭敬銘悉心籌畫相機布置另片奏前
因遊擊王心安那借餉銀經嚴樹森咨調赴鄂歸案訊辦見在該
遊擊管帶新募楚勇未便遽易生手請暫畱東省等語王心安著

准其暫畱東省帶勇隨同勦辦東昌叛匪一俟軍務稍鬆卽行派員押解赴鄂歸案訊辦將此由六百里諭令知之○予山東陣亡知縣張振榮祭葬世職○辛酉 文宗顯皇帝二周年忌辰 上

詣 奉先殿行禮○諭內閣前任漕運總督袁甲三老成正直強毅有爲由部曹著聲臺諫出厯戎行蒙 皇考文宗顯皇帝特達之知疊擢京卿簡任漕運總督畀以欽差大臣重任自逆捻縱橫皖豫數年統軍淮甸擒滅張漉等巨股屢次克復鳳陽府縣各城勤勞懋著備厯艱難前在臨淮軍營積勞致病屢經奏請開缺准其回籍適值苗練復叛以該漕督矢志滅賊本籍陳州毗連淮潁復經諭令在籍督率兵團兼施堵剿猶能籌餉籌兵悉心捍禦前據奏稱沈疴未愈又復疽發於背方冀調理就痊堪資倚任茲據張之萬奏該漕督於防所遽爾溘逝念其力疾籌防歿於王事披

覽遺摺悼惜殊深袁甲三著照漕運總督軍營病故例從優賜卹
歷任一切處分悉予開復應得卹典該衙門察例具奏伊長子前
詹事府右庶子袁保恆著俟服闋後以翰林院侍講學士卽補次
子舉人袁保齡著賞給內閣中書用示篤念盡臣至意尋予祭葬
諡端敏○壬戌諭內閣前因中外諸臣交章奏參勝保貪污欺罔
各款當經降旨將勝保革職拏問交刑部治罪嗣經刑部奏稱勝
保押解到部復派議政王軍機大臣大學士會同刑部審訊節經
王大臣等將勝保親供呈覽於被參各款恃無質證一味狡展而
於攜帶姬妾赴營一節則業已承認不諱本日復據王大臣等陳
奏勝保所遞親供及訴呈各一紙更堪詫異勝保於督兵入陝之
初人言藉藉朝廷不惜諄切訓誡至再至三原期其力洗前愆立
功贖罪乃入陝以後仍復肆無忌憚怙惡不悛卽其所自認攜帶

姬妾赴營一節已屬大千例禁諭旨諄諄訓誡之謂何竟敢視若弁髦欺藐朝廷至於此極苗沛霖性情陰鷲曾諭勝保察其就撫是否可靠勝保極口保其無他並乞恩施且擅調其練眾入陝迨諭旨不准猶敢屢次抗辯今苗沛霖已戕官據城肆行背叛宋憬詩以反覆降匪經勝保代爲捏報戰功保至參將後又在陝擁眾東歸亦已背叛是今日苗宋二逆之糜餉勞師皆勝保之養癰貽患所致而勝保之黨護苗宋二逆不得謂無挾制朝廷之心至勝保被參各款前經僧格林沁覆奏有派員查訪並諮詢地方所稱大略相同勝保任情妄爲卽此已可概見等語是勝保之貪污欺罔實天下所共知豈能憑其自行迴護之詞信爲竟無其事據勝保本日所遞訴呈內博引律例妄欲將原參各員治以誣告之罪尤屬飾非亂是膽大妄爲覈其種種情罪卽立正刑誅亦屬咎所

應得姑念其從前勦辦髮捻有年尙有戰功足錄勝保著從寬賜
令自盡卽派周祖培綿森前往監視所有案內牽涉人犯卽著刑
部分別提審訊明奏結以清積牘○諭本日候補宗人府府丞溫
葆深奏謹陳管見摺內推廣捐例一條有請世給生員舉人俾守
其業等語軍興以來捐例之設實屬萬不得已各該州縣捐有成
數曾准加廣文武學額中數於獎勵捐生之中寓嘉惠士林之意
此外或乃祖乃父爲國宣勤朝廷篤念盡臣於其子孫特加賞賜
以旌勞勩此尤異數之恩豈得援以爲例若因一時急公捐助米
粟而使其後人得以生員舉人長荷國恩竟同世襲將富民皆得
濫廁科目而寒士何由奮志功名且從來亦無此政體該員所奏
識見迂謬斷不可行○諭議政王軍機大臣等劉長佑奏督軍勦
匪兵力尙單請飭東撫駐紮東南以資夾擊各摺片見在直軍勦

賊正當喫緊且東南一帶地而遼闊防兵單薄紛竄堪虞著閻敬銘迅速前旨先將前派赴堂邑三營並王心安所募楚勇三千名催令設法渡河無分水陸趨行前進交丁寶楨保德安爲調遣新到兵勇恐難聯絡仍著閻敬銘探明道路卽行啟程馳赴清博一帶以資控馭山東兵勇未到以前著劉長佑飭令丁寶楨就見有兵力防剿柳林等團向稱得力務當激勵聯絡俾爲我用不得藉口兵單稍涉疏懈將此由六百里各諭令知之○唐訓方奏自總兵姚廣武派馬隊繞出狼山之東鈔賊糧道該逆於初五日夜將十四營賊眾全行退竄臬司馬新貽等督隊追擊姚廣武亦親督馬隊由山後會合窮追擒斬甚眾馬新貽復恐守城兵單該逆乘間襲取當派都司李同勝等帶勇馳回蒙城時渦河南北兩岸之賊進逼蒙城見我軍回援遂各歸壘自守蒙城圍雖未解糧道已

通該逆不得逞志於蒙於是益抽精銳前赴懷遠困我前敵並於
初八日夜將距懷十里宋家圩襲陷連營六座直抵河岸連日文
報軍糧盡爲阻絕適楊岳斌彭玉麟所派總兵丁泗濱王吉等統
帶礮船百號趕至臣當令總兵何紹彩四營會合往援當能力挫
兇鋒俾前敵復臻穩固惟陸師以分防苦戰近復傳染時疫該將
士力疾進征能否迅解賊圍尙未可必惟有仰懇 天恩飭下僧
格林沁轉飭黃國瑞一軍星馳援蒙臣卽抽換蒙城數營回援臨
淮稍紓兵力庶可節節埽蕩而皖北大局不致動搖矣 上諭蒙
城圍雖未解糧道已通該逆不得逞志於蒙於是益抽精銳前赴
懷遠困我前敵楊岳斌等所派丁泗濱等統帶礮船百號見已駛
至經唐訓方令其會合總兵何紹彩往援當能力挫兇鋒俾前敵
復臻穩固惟陸師以分防苦戰近復染疫能否得力尙不可知唐

訓方請飭僧格林沁令黃國瑞一軍星馳援蒙該撫卽抽換蒙城
數營回援臨淮稍紓兵力刻下山東匪勢已蹙卽宋憬詩一股有
直東兵勇合剿似尙不難了結著該大臣自行察度如東匪卽日
可以蕆事該大臣卽可親統大軍南下以得勝之師削平苗捻或
一時不能親往卽令黃國瑞一軍先赴蒙城聽唐訓方調遣該大
臣務當酌量情形星速援皖毋令稍有疏失吳棠當飭姚廣武竭
力會剿並將徐宿各捻股設法剿除唐訓方就見有兵力固守臨
淮並催令丁泗濱等水師速赴懷遠力顧前敵痛挫兇鋒不得專
待援師致滋貽誤染疫士卒善爲拊循以期得力吳棠所奏翁廷
奎勇丁滋鬧淮安關署情形所擬辦法甚爲草率顯有不實不盡
著該漕督再行確查按律懲治無稍姑容淮關應解清淮軍餉二
萬三千兩著就近催令該監督按月撥解李鴻章吳棠另摺奏江

北各屬漕米仍請准收折色以濟揚營餉糈等語本年江北各漕
著仍照向章折徵畱充揚營軍餉以資兵食將此由六百里各諭
令知之○諭瑛榮奏漢中危急萬分請飭催川楚援師迅速進剿
一摺漢中被圍已久疊經諭令官文璐秉章等迅調兵勇赴援數
月以來張由庚朱桂秋兩軍總無出境消息梁作楫一軍雖已行
抵興安據稱接准該省督撫飭諭令其卽在興安駐紮不可冒昧
前進是朝廷移緩就急徵調援師該文武員弁等竟敢任意遷延
全不以國事爲重道員張由庚總兵朱桂秋均著先行交部嚴加
議處道員梁作楫著先行交部議處劉蓉業已擢升陝撫責無旁
貸著略秉章會同該撫嚴飭張由庚等星夜赴漢南援剿劉蓉亦
卽督率後起之何勝必等軍趕緊前進力解漢中之圍並著官文
迅飭梁作楫由興安拔隊進援毋得以楚省邊防緊要藉詞觀望

李雲麟前已出京著官文等傳諭鄂省援浙各營俟李雲麟到陝
統歸調遣以期得力股首陳玉和就擒正法亦足以稍寒賊膽劉
蓉未到任以前著張集馨轉飭毛震壽激勵諸軍勉力支持毋稍
貽誤漢南各營軍餉仍著張集馨妥籌運解藉資接濟署花馬池
營參將王錫爵久未回營該參將本係雲南回教難保不投入賊
營並著劉蓉張集馨查明下落據實奏聞將此由六百里諭知官
文駱秉章嚴樹森劉蓉並傳諭張集馨知之○申禁民間私販馬
匹○允李鴻章奏本年江北漕米仍收折色備揚營軍餉○予江
蘇陣亡知縣符宋英祭葬世職○癸亥諭議政王軍機大臣等慶
昀等奏遵查阿拉善蒙兵情形一摺阿拉善蒙兵前於平羅邊口
遇伏失利朝廷卽慮其畏葸難用茲據慶昀等歷陳該旗遷延不
進情形是此項兵丁萬不足恃見雖經慶昀等疊次咨催始有繞

道過渡進邊口馳赴慶陽之說而遠來疲乏斷不可用爲前敵致
債事機至鄂爾多斯蒙兵已在口外阿拉廟等處且據慶昫奏稱
較阿拉善兵差勝卽著熙麟飛檄嚴催齊抵慶陽以厚兵力其阿
拉善旗官兵抵慶陽後應令屯紮何處藉壯聲援並著熙麟酌量
調遣平涼已否解圍甘肅軍情近日如何熙麟務當隨時奏報以
慰厯系將此由六百里各諭令知之○甲子曾國藩奏查金陵各
軍疾疫過半鮑超所部霆營爲尤甚僞忠王等糾率悍黨堅守老
巢時復伺隙出戰以圖一逞六月二十二日突分兩股一出儀鳳
門直撲鮑超霆字右營一出太平門繞撲劉連捷南字等營我軍
轟擊竟日負創始遁七月初一日又以西瓜炸礮猛攻劉連捷下
關營寨勢更兇悍得水師協力苦戰擊退而李城謀與劉連捷各
受槍傷幸不甚劇見在劉連捷營外明掘直濠暗開地道計日內

必有數次惡戰准李鴻章鈔送忠逆等僞文新調僞護王湖王同
援金陵僞展王改守句容但頗羣逆畢萃金陵或者蘇常等處有
機可乘張運蘭自上年十月間因病回籍所部湘勇十營卽派部
將易開俊劉松山各統五營分守甯國府涇縣兩城甯國當廣德
建平之衝涇縣當太平石埭之衝易開俊等內防外剿屢卻賊氛
城垣賴以保固所駐皆係最要之地臣處別無換防之師接據毛
鴻賓來函亦以該營欠餉過多一時恐難抽動已令張運蘭另募
三千人帶赴粵中則原部湘勇自應仍畱皖南以資得力太平石
埭之賊於六月十七日分股進章嶺羊棧嶺竄入黟縣意將由上
溪口衝出婺源就食江西十八日王文瑞自祁門督軍會合劉典
畱守漁亭各營併攻黟縣城一戰克之驅賊至嶺外十數里擒斬
甚眾此次幸仗天威剿辦極速不使徽州更增一患卽免江西

再設一防江忠義李榕兩軍駐守湖口堅山之戰僞堵王黃汶金
寶負重傷官軍追勦亦獲勝仗七月初三夜堅山營中俯瞰文橋
賊巢火光隱約江忠義知賊將宵遁約李榕於將曙時引軍襲破
諸壘賊乃敗過黃沙嶺分竄都昌彭澤境內湖口已無賊蹤臣當
催令江忠義李榕等欽遵 聖諭速籌進勦至 臣前調黃翼升淮
揚水師由洪澤湖赴援臨淮須俟李朝斌太湖水師到滬後交替
防務始得自上海拔營西上誠恐展轉需時緩不濟急因飛商彭
玉麟楊岳斌等在長沙水師內暫派三板八十號先赴臨淮日內
計可趕到至太湖師船見已陸續入滬李朝斌亦可即日抵防上
海戰船足數分布相應請旨飭下署江南提督黃翼升親統淮揚
水師之半剋日駛往臨淮仍分一半畱滬助勦責成該署提督往
來布置兼顧淮滬兩防俟克復蘇州後卽將駐滬各營分紮洪澤

湖以下巡防淮揚通泰等處駐淮各營分紮洪澤湖以上巡防潁
澮渦等河又奏近接李世忠來函有五河地方爲臨淮後路儻苗
逆下竄誓必堅守五河決一勝負等語李世忠與苗逆積怨甚深
其發憤鋤苗旣伸公義又報私仇似屬出於至誠若坦然相處不
至別生枝節至彭玉麟楊岳斌所派三板八十號已由元汴洲先
後開行計此時均可趕到輔助臨淮兵力 上諭議政王軍機大
臣等金陵逆匪聚集悍黨堅守老巢時復伺隙出戰並有白齊文
投入賊中廣置炸礮分解金陵曾國藩務當飭令各營豫爲布置
以防該逆用礮轟撲勿稍大意並著李鴻章於滬上及沿江隘口
嚴密接查以斷該逆接濟僞護王等逆首畢萃金陵蘇常等處賊
勢必單李鴻章正可飭令所部各軍乘機克復爲步步進逼之計
張運蘭已在楚南另募三千人赴粵其原部湘勇見駐甯國等處

防剿自應仍畱皖南以資得力石太股匪竄入黟縣經王文瑞督兵克復將賊眾驅出羊棧嶺外仍著曾國藩飭令徽防將士會合浙軍嚴密堵遏毋令再竄入境江忠義李榕兩軍在堅山等處獲勝逆匪分竄都昌彭澤境內湖口已無賊蹤著曾國藩卽飭江忠義等軍速由湖口與饒郡各營合力並進由石太一路東下埽盡逆氛乘勢進攻東壩以期與滬浙各軍聲勢聯絡前據唐訓方奏李世忠一軍突如其來疑係矯託兼恐坐觀成敗是以有旨令曾國藩設法調回旣據曾國藩察其防守五河之意尙屬至誠著卽將詳細情形知會唐訓方辦理並著唐訓方妥爲駕馭毋令別生枝節賊眾麇聚臨淮與唐訓方併力相持情形甚緊彭玉麟等所接舢板船八十號計日可到臨淮著唐訓方督飭水陸各軍奮力攻擊迅埽逆氛毋稍延緩李朝斌所部太湖水師旣已陸續入滬

上海戰船足敷分布黃翼升所部淮陽水師著李鴻章將一半留
滬助剿其餘一半卽飭黃翼升親行統帶速赴臨淮惟淮滬兩處
相距較遠黃翼升往來布置能否兼顧仍著曾國藩李鴻章酌量
辦理所請俟克復蘇州後將滬淮各營分紮洪澤湖等處及蘇皖
兩省供支黃翼升軍糧餉火藥章程均著照所議辦理將此由六
百里各諭令知之○諭多隆阿奏南北兩岸疊獲大勝攻毀賊巢
多處及遵飭德興阿赴省各摺片多隆阿見在駐軍三府里該處
距西安省城密邇日內該將軍當已親抵省垣布置一切防守無
虞陝省軍情當可日有起色殊慰廬系多隆阿自上年督軍入陝
所向克捷復以偶嬰瘡疾各營將士亦多久勞多疫以致省城及
西路軍情未能兼顧西顧每深廬慮茲據所奏渭河北岸連克蒲
桃窪拜家村賊巢南岸連克三府里白鴨鰲及馬烏什十餘村堡

大誓三軍卽日攻下沙窩賊之老巢霆擊風馳軍聲丕振所辦極爲得手多隆阿抵省後瑛榮業經革職著與張集馨穆騰阿等將城守內外妥爲籌布卽嚴督諸軍乘此聲威將東西兩路回逆迅速全行埽除馬德昭所部是否可交德興阿統帶鳳翔被圍幾及一載或卽派馬德昭前往抑另派大員赴援之處著多隆阿迅速妥籌辦理不得再有遷延以致救援莫及該將軍督辦今陝軍務東西兩路均屬責無旁貸高陵縣城是否尙爲賊踞此處攻克東路各軍便可與雷正綰三原之兵會合將西路逆氛痛加埽蕩以次廓清甘省軍情熙麟駐守慶陽兵力過爲單薄多隆阿亦應遵奉疊次諭旨隨時兼顧乘勝迅將全陝肅清自可速籌分兵應援毋得稍存膜視溫德勒克西常星阿二員據稱連日接仗戰功卓著本日已降旨交部優敘指日全陝肅清必當疊膺懋賞該大臣

仍飭令奮勉圖功可也將此由六百里諭令知之○乙丑諭議政王軍機大臣等毛震壽奏漢南攻剿情形及歷陳艱窘請於川楚借地抽釐以裕秦餉各摺所奏漢江南北兩岸賊蹤蔓延進兵之路須從北岸之十八里鋪東西文川及南岸之油房街西路之長寨三面夾擊方能應手而見在兵力尙單疾疫又重惟有先疏糧道以救漢中毛震壽見已進次青石關飭催易佩紳進紮南岸之法慈院與郡城文武相約併力據漢中之險聲息聯絡以爲一路生機等語所籌尙合機宜著卽妥爲辦理力保郡城以待援師仍著劉蓉懍遵疊次諭旨星速馳赴漢南統率諸軍了解郡圍官文嚴樹森駱秉章嚴催川楚派援各軍前往如再遷延卽著指名嚴參懲辦鄂省援師須俟李雲麟到後交其統帶未知該員何日方可抵陝劉蓉抵漢南後著卽併歸節制以一事權將陝南之原有

各軍加以激勵與川楚援師合併調遣俾資得力漢江南北岸三路進兵是否切中機宜並著妥籌進取劉蓉未到以前毛震壽仍當竭力戰守毋得稍涉鬆勁致滋罪戾陝南藍張郭曹與鄧逆股匪竄併又有興安捻股連成一片漢中城固兵力本單而餉尤缺乏毛震壽所陳艱窘各狀尙屬實在情形不得已而籌及川鄂兩省借地抽收鹽貨兩釐以爲接濟之策或當有濟卽著官文嚴樹森駱秉章按照所奏竭力籌辦毛震壽摺一件著鈔給官文嚴樹森駱秉章閱看多隆阿勦辦渭河兩岸回匪甚爲得手昨經諭令乘勝速將陝省東西兩路逆回次第勦除劉蓉抵陝南後當能與該將軍隨時關照以籌全局克副委任也將此由六百里諭知官文嚴樹森駱秉章劉蓉並傳諭毛震壽知之○河南學政景其濬疏薦副貢生蘇源生等品學兼優命以本省訓導用並諭曰嗣後

各省學政務當認真考察如有經明行修之士許酌保數人不准
視爲常例濫行保奏○以三姓地方江流泛溢諭景綸等撫恤被
水居民○丙寅諭內閣朕奉 慈安皇太后 慈禧皇太后懿旨

文宗顯皇帝龍馭上賓倏經三載本年十月卽屆釋服之期春
露秋霜曷勝悽愴我朝定制皇帝於釋服後一切慶典均應次第
舉行惟念 梓宮尙未永遠奉安遙望 殯宮彌深哀慕若將應
行慶典一切照常舉行於心實有不忍除朝賀大典均仍照常舉
行外其各項慶典及內外王公大臣筵宴應如何分別舉行停止
之處著議政王軍機大臣御前大臣會同禮部等衙門妥議奏聞
至萬壽禮節向有賞王大臣聽戲筵宴著一併停止俟永遠奉安
後與一切慶典再照例舉行以符舊制所有昇平署歲時照例供
奉並著俟 山陵奉安後候旨遵行其咸豐十年所傳之民籍人

等卽著永遠裁革○諭議政王軍機大臣等黃贊湯奏高州各路軍情及辦理釐金亟宜酌量變通東北兩江盜匪蠢動各摺片逆匪陳金缸占踞信宜縣城已將三載勞師糜餉日久無功見在卓興方耀兩軍雖經崑壽派員勸解釋怨和衷而積疲之餘未必卽能振作毛鴻賓前奏擬募楚勇數千派張運蘭帶赴粵東剿賊此事想已募練成軍卽著迅速啟程先將高州軍務認真整頓務令壁壘一新迅殲大憝此股巨匪一滅則辦理餘匪自可迎刃而解郭嵩燾前經諭令由海道赴粵此時想已啟程卽著趕緊前進廣海寨城雖經吳昌壽督兵圍偏而賊援未斷仍屬可虞毛鴻賓等到省後務飭該藩司慎密防範毋稍疏懈至土客互鬪猜貳已深兵連禍結曾無已時該督撫等務當持平妥辦懲其首逆散其脅從以期逐漸相安永消爭釁粵省釐金止有廣肇惠韶四府一律

辦理而潮廉瓊三府卽有毆官罷市之舉近來南海等縣紬行人等又復聚眾歇工藉端懇免抽釐助餉原係一時權宜萬不得已之舉固不可任意苛斂致怨譴之繁興然刁商聚眾阻撓藉端要挾此風亦斷不可長軍興以來辦理釐金惟兩湖辦有成效毛鴻賓曾任湖南巡撫有年郭嵩燾籍隸湖南在籍日久於此中利弊知之甚悉卽著於抵任後體察情形妥爲籌辦務令商賈不苦擾累軍餉可以源源接濟方爲妥善東北兩江盜匪蠢動亟應乘其初起趕緊撲滅俾免燎原黃贊湯摺片三件均著鈔給閱看將此由六百里各諭令知之○予湖北陣亡主事蔡恭銓祭葬世職入祀昭忠祠○丁卯以賊毀尼山 聖廟鑄孔祥珂閭敬銘級○戊辰諭內閣前任兵部左侍郎黃琮持躬端謹自告養回籍適值滇省軍興數載以來於省城防守及勸捐銀米各事宜尙能竭盡心

力辦理茲於本年正月雲南省城之變遽以憂憤投繯自盡遺章
披覽憫惜殊深黃琮著照侍郎例賜卹歷任處分悉予開復應得
卹典該衙門察例具奏○諭近來各直省大吏保舉賢員一經奏
到無不量材器使並經疊諭中外臣工於所舉各員務須循名覈
實不得濫保非人本日據曾國荃奏敬陳管見臚舉賢才各摺片
其所保各員既經該撫切實保奏自必能灼見真知足資任使除
郭崑燾前已有旨飭赴直隸軍營差委李瀚章已簡授廣東按察
使外所有按察使劉連捷記名道彭毓橘候選道陳湜江蘇候補
道易良虎羅麓森江蘇候補知府彭椿年候補縣丞趙烈文浙江
溫州府知府周開錫卽用知縣常甯縣教諭成果道均著交軍機
處存記候旨擢用湖南拔貢生易孔昭江蘇生員管樂並著准其
調赴軍營差遣委用黃冕一員前經毛鴻賓奏調已准其畱於廣

東差委金安清聲名狼藉屢次被人糾參由曾國藩審訊覆奏該革員經手錢糧濫支濫應意存含混降旨革職並勒令賠繳欠款爲數甚鉅該撫所請調赴軍營之處著不准行○曾國荃奏官軍攻克雨花臺等處後賊勢日蹙提督鮑超與候補臬司劉連捷進紮城北神策門下關一帶城中賊匪連日出隊撲營均經擊退自六月初一日起臣督飭各營進攻印子山賊壘持久未下至七月初五夜派隊晁水過河襲破賽拱橋邊土壘一座盡殲守賊江東橋水西門之賊屢犯西路經候選道陳湜督隊擊退臣以爲欲分北路西路之賊勢莫如猛攻東南之印子山賊壘諸將咸以爲然初六夜傳令三路出隊進攻三更時東草壩濠拔籤架梯守壘之賊槍礮如雨各弁勇奮不顧身紛擲火彈肉薄齊登初七日黎明攻克山頂石壘一座殲斃僞佩王馮眞林奪獲礮械旗幟多件其

七寶橋附近逆壘賊匪加隊死守我軍壘攻未下初九日該逆分
路出撲經我軍分投迎剿該逆敗竄七寶橋邊各軍乘勢攻克石
壘一座土壘三座壘中之賊鮮有脫者城中之賊復出洋槍大隊
萬餘人李秀城率之過橋猛撲臣適在印子山督陣令我軍佯退
以誘之伍維壽率馬隊先從右路包鈔哨官唐遠光等併力前進
賊遂不支提督蕭孚泗等分路進擊將賊隊衝爲兩段鏖戰三時
之久賊眾敗潰我軍三路追殺斃賊甚多陣斬僞梯王練榮發及
僞汝幅以下賊目數十名奪獲旗幟器械無數臣因兵力尙屬不
敷咨調守江浦浦口之候補提督蕭慶衍率七營過江擬紮至七
寶橋河邊以扼秣陵關小河入城之路仍畱一營守江浦縣城至
金陵城大必須增募萬眾合圍庶可剋期掃蕩李鴻章奏吳江縣
城收復後逆匪復圖竄撲六月二十一日蘇州之賊竄偪夾浦口

營盤總兵陳有昇等堅守不動是夜賊率大股猛撲水師總兵張光泰等挑選洋槍隊奮勇登岸黑暗中喊聲震天該逆惶遽退走二十三至二十七等日平望之賊連撲同里另股二三千人直衝吳江東門營盤副將陳東友督率水師分路堵剿副將何安泰亦帶隊出城援應擒斬甚多該逆駭船復由北庫駛出闌入同里旋經官軍擊退二十九日何安泰等督隊追剿沿途將褰腰橋等處賊壘攻破斃賊多名官軍追至平望始行收隊其太湖一帶賊卡亦經水師攻毀見在總兵李朝斌督帶太湖各營已於本月初五日抵滬陸續進發臣與李朝斌晤商數次該鎮明白勇幹洞悉機宜惟於蘇浙交界形勢及前敵各陸師素未熟習臣擬卽日會同該鎮前往蘇崑吳江各路周歷察勘妥籌布置以便聯絡而資攻取至總兵劉銘傳等進攻江陰之兵已於初四日拔隊前進編修

劉秉璋等進攻楓涇嘉善之兵亦於十一二日會同進紮臣當次第親往各路督籌妥辦所有陣亡都司王新華應請旨交部從優議卹上諭議政王軍機大臣等金陵賊勢窮蹙官軍攻剿喫緊之際該逆困獸猶鬪勢必拚死抗拒曾國荃所奏旬日間戰守各情並將城東南之印子山賊壘攻破諸軍將士皆能奮勇倍加喋血苦戰曾國荃見在檄調江浦浦口之蕭慶衍七營過江以紮七甕橋河邊扼守秣陵關小河進城之路並以金陵城大向須增募萬眾以冀合圍剋期掃蕩惟江浦浦口等處防兵亦不可過於單弱著曾國藩與曾國荃妥籌相機辦理仍須謀出萬全以期必勝蘇常之賊回救金陵其間宜有可乘之機吳江水陸各營既將蘇嘉兩路大股援賊擊退總兵李朝斌督帶太湖水師到滬陸續進發李鴻章會同該鎮卽日前往蘇崑吳震各路周厯布置並督同

劉銘傳等進攻江陰之兵劉秉璋進攻嘉善之兵聯絡進紮著卽乘機進取將攻擣各情形迅速馳奏戈登以白齊文投賊恐常勝軍皆其舊部爲所勾結乞加口糧該撫不得已而勉徇其請仍著李鴻章妥爲駕馭籠絡用之以資其力曾國荃所保各員自係爲時勢艱危籌兵籌餉急切需材起見第恐其中或有爲人聳動之處如黃冕已經有旨准毛鴻賓所請調赴廣東金安清聲名甚劣屢次被人糾參由曾國藩審訊革職並有應行賠繳欠項甚鉅是以明降諭旨不准調往軍營曾國荃經朝廷簡任封圻受恩至渥倚畀方殷當茲軍事萬分喫緊宜時以儆懼存心其於左右任使之人必須慎之又慎方不至以引用非人致爲該撫聲名之累軍中機務殷繁艱鉅所集仍宜遇事加意檢點並須與曾國藩隨時商榷以求萬全是爲至要將此由六百里各諭令知之○唐訓方

奏據丁泗濱等來稟該鎮等於七月十二日駛至小蚌埠與賊接
仗奪獲逆划二十一隻燒毀二十餘隻復登岸攻破逆卡直撲逆
壘鏖戰逾時共斃賊七八百人詎賊以死踞壘未卽下該逆復乘
夜於沙洲增壘四座並於兩岸添築礮臺十四日往攻兩岸逆眾
愈多巨礮齊施我兵傷亡不少祇得收隊仍紮小蚌埠等情臣念
前敵各營堅守苦戰逾四月矣若不設法濟運飢潰卽在目前適
黃開榜統帶礮船百號於十五日到臨臣當派船五十隻裝載米
麵運送前敵各營詎該逆又從沙河窄狹處橫施鐵鎖木椿而以
槍礮伺擊我軍到彼斷鎖拔椿捨命衝突勉將糧石送過而受傷
者亦復不少見探該逆又於河沿多備竹石意圖橫截河流此後
糧運斷難爲繼情形危急至此臨軍後路更單臣雖函致曾國藩
添派勁旅來援而皖營兵力有可抽撥與否尙屬未定卽令有兵

援應而前敵各軍能否支持以待猶未可知臣再四思維惟有趁蒙城賊勢稍鬆酌調馬新貽帶領王才秀一軍千餘人來臨力保後路畱姚廣武英翰兩軍及李南華等各練眾於蒙城一面迅催僧格林沁所派援兵乘此蒙賊調赴淮岸立解城圍直擣該逆老巢俟該逆回顧臨軍卽乘勢力圖懷遠似爲一舉兩得再李世忠派總兵朱元興援臨尙無騷擾地方之事近復增兵五百人均由朱元興帶領進紮劉府一帶是否實力勦辦再行據實密陳上諭該逆於沿河多備竹石意欲橫截河流此後糧運斷難爲繼臨軍後路亦形單薄情形危迫萬分非有陸路援軍速行馳救大局將不堪設想曾國藩所部各營雖不敷分布亦當於無可籌撥之中勉強抽派一軍星馳援應會同臨淮水陸各營將沙洲賊壘攻破毋得游移致誤戎機蒙城賊勢稍鬆唐訓方見調馬新貽一軍

馳赴臨淮力顧後路並催僧格林沁所派援兵進解城圍直擣該逆老巢俟賊匪回顧時卽令臨淮各軍乘勢力圖懷遠著僧格林沁卽飭令諾木津等軍迅速照辦不准觀望遷延並著僧格林沁速將洪山教匪攻克星夜督軍馳援皖北以救然眉李世忠派總兵朱元興進援臨淮尙無騷擾地方之事近復增兵五百人均由朱元興帶領進紮劉府一帶如果實力攻剿卽著唐訓方妥爲聯絡會合進取以厚兵力並著唐訓方設法疏通糧路接應前敵各營毋令缺乏將此由六百里各諭令知之○諭張之萬毛昶熙奏攻克衝要賊圩見籌進剿情形一摺亳州廬廟地方勢居衝要捻匪盤踞其中復將出竄經遊擊呂振河等將匪圩攻克平毀見在官軍進剿毫東之路已通毛昶熙擬卽進紮鹿邑規取毫東各捻圩著卽調派兵勇乘機進剿節節掃蕩毋稍鬆勁潁州練總赴陳

郡者頗多經毛昶熙於道經陳州時親加撫慰令其回潁傳諭各寨同心守禦以輔官兵著張之萬卽飭張曜由陳郡進兵潁郡聯絡該處紳團協同攻剿並隨時與毛昶熙所部各營互相援應前據劉長佑奏祝壇軍營襄理需員請飭調候補知府李徵松來直等語著張之萬卽飭該員迅赴直隸軍營毋稍遲緩將此由六百里各諭令知之○諭徐之銘奏逆首馬榮勾結前副將馬聯升攻陷平彝圍攻宣威曲靖經岑毓英督兵克復平彝並解府州城圍暨查辦謀殺邱北縣辦撫委員戕害署廣南守吳維鼎全家多命之要犯李世培一案請將兩案出力殉難各員分別獎卹參將施嘉賓並懇以總兵記名又署東川府知府黎新德在任被戕開復知州熊夢昌等仍請革職各摺片徐之銘前已有旨令其來京聽候議罪該革員在滇與回教官紳同惡相濟所奏收復平彝殲戮

李世培等案鋪敘勞績列保多員殊難憑信勞崇光近在滇省賈洪詔已由楚赴川前往東川籌辦進剿事宜卽著按照徐之銘所奏各情妥爲查辦是否實有其事其殉難出力各員是否確實一併查明具奏再降諭旨滇省見在全境糜爛僅東川昭通二府尙可爲將來勦辦滇省進兵之路而署東川守黎新德忽被練戕情節可疑著該督撫等嚴密詳查一面將戕官練眾設法擒獲毋任漏網至知州熊夢昌知縣高青雲二員前經張亮基奏保開復原官此次徐之銘復劾其營求徇情仍請革職該二員在滇究竟有無劣蹟張亮基所請開復之處是否允當並著勞崇光等一併查明請旨徐之銘摺片均著發交勞崇光賈洪詔閱看再徐之銘於本年三月二十七日降旨革職來京議罪距今已有四月之久何以若罔聞知依舊列銜奏事或係部文尙未接到著錄寄明發諭

旨一道交勞崇光賈洪詔恭錄設法行知俾令知悉將此由六百
里各諭令知之○命辦理三口通商大臣兵部左侍郎崇厚爲全
權大臣辦理荷蘭國通商條約事務○己巳廣湖北蘄州學額九
名黃梅縣七名○僧格林沁奏查唐訓方請飭黃國瑞一軍星馳
援蒙見在教匪盤踞紅山人數甚眾臣督各軍環紮營壘尙虞賊
眾兵單且黃國瑞之軍堵禦東面正當喫緊若一經抽撤設賊眾
竄撲東面深恐滋蔓難圖不若就各路之軍會合攻剿將此股教
匪殲除再飭黃國瑞一軍先行援蒙至臣所統馬隊大半皆在河
北爲宋憬詩一股牽掣昨已函致督臣劉長佑催其迅將宋逆一
股剪滅將來蘇克金恆齡兩軍即可隨臣南征見據代理岷縣知
縣陶錫祺稟報捻匪李大箇子等盤踞徐西婆羅店一帶意圖北
竄邊馬已抵沿河等情臣思苗逆鴟張皖境待援迫切亟須大兵

南下而宋逆一股經劉長佑督辦數月或戰或撫尙無定見因之蘇克金恆齡兩軍日久牽掣據保德丁寶楨稟報宋逆欲行投誠當經臣札飭蘇克金等查明稟報茲據覆稱仍未定期進剿亦未酌准投誠查直隸總督爲一省表率從前文煜孫治勦賊失利彼時原無得力之兵今馬步勁旅雲集河北該督優柔寡斷勞師糜餉實難望其振作臣因河北未靖日夜焦灼若俟敎匪殲除彼時宋逆仍未剿滅勢須移軍河北惟捻氛既有北竄之意我軍一經移動必致尾隨竄擾則東境又被蹂躪是進剿宋逆萬難再緩相應請旨飭下蘇克金恆齡會督馬步各軍趕緊進兵所有直東馬步悉歸調遣以專責成而殲醜類上諭議政王軍機大臣等苗逆圍撲蒙城未能得手近復添調悍黨橫截淮河阻遏前敵各營運道昨據唐訓方馳奏情形萬分危迫曾國藩所部多在西南兩

路防剿勢難抽撥來援必須僧格林沁督率馬步全軍前往剿辦庶可埽除苗捻迅速奏功惟教匪盤踞洪山仰攻頗難得力黃國端之軍堵禦東面正常喫緊未能抽調赴皖該大臣所統馬隊大半皆在河北爲宋憬詩一股牽掣是直東股匪未清該大臣全軍斷難南下劉長佑身膺督辦之責馬步各軍悉歸節制爲數已屬不少何以區區小醜竟不能剋日殄除見在塗潦諒已消涸高粱茂密處所應已一律芟除卽著劉長佑督同恆齡蘇克金丁寶楨等軍合力進剿擣穴擒渠盡殲醜類毋得任意遲延致干重咎宋憬詩本反覆無常之小人雖據保德丁寶楨稟報該逆有悔罪投誠之說殊難深信劉長佑惟當乘此大軍雲集之際一鼓殲除俾直東交界處所永無後患其恆齡蘇克金等軍旣暫歸劉長佑節制卽應會合馬步兵勇齊心協力相機進剿將此股迅速完結得

以及早隨同僧格林沁南征苗練方爲無分畛域出力報效丁寶楨部勇無多前經諭令閻敬銘添兵助剿卽著該撫迅催前進毋得以阻水爲詞任意延緩程順書一犯前據劉長佑奏明正法此次保德等稟內有令宋逆剿捕竄匪陳順書等之語陳順書是否卽程順書並著劉長佑查明具奏敎匪恃其險阻拌死抗拒僧格林沁見督令各軍環山築壘該逆糧食將盡勢必乘隙圖竄該大臣尤應密飭各營將領嚴防竄逸仍一面激勵諸軍用間用奇設法力拔賊巢以收聚殲之效將此由六百里諭知僧格林沁劉長佑閻敬銘並傳諭恆齡蘇克金知之○諭都興阿富明阿奏師船移赴下游防堵並撥礮解赴臨淮一摺據奏金陵上游楚師聲威已壯見在滬軍水陸攻剿江陰下游一帶亟宜水師聯絡並探知丹陽等處逆眾紮成木排甚多有圖犯太平洲之勢各處港口甚

爲喫重飭梁正源將所部船隻分撥下游各港口駐泊吳全美親督礮划周歷各口上下嚴防又派李起高等各船聯絡上海相機助剿所籌均妥著卽督飭該鎮將等認真梭巡遇賊卽擊不得任令北渡見在南岸江陰一帶屢添悍賊該處江防不甚嚴密恐其乘隙竄突擾及裏下河完善之區吳全美總統水師聞其並不十分得力該將軍等務當隨時查察軍令是否嚴明所部水勇人等是否足資倚靠儻虛應故事不能得力或仍有縱勇滋擾情事卽應隨時奏請更換無少姑容江防各口與裏下河處處可通尤應嚴加防範前有渡江遷徙難民不免游匪溷迹屢經諭令嚴加查察未知前此已渡難民作何安置近聞髮逆句合江北教匪爲內應乘隙思逞其髮逆薙髮易服潛伏江北者甚多都興阿富明阿與吳棠惟當各以地方大局爲重嚴飭所屬營員及地方官不動

聲色實心實力查拏奸宄不可稍萌退諉之志如內奸不清釀成
變亂惟都興阿富明阿吳棠是問臨淮軍情緊要都興阿所撥礮
船卽令管帶之員迅速駛往是爲至要將此由六百里各諭令知
之○撥察哈爾馬一千匹解僧格林沁軍營○辛未沈葆楨奏皖
南大股髮逆上竄江西之湖口都昌一帶自官軍槍傷虎逆各僞
王設伏壘左以圖掩襲江忠義會商李榕於六月二十八日以一
軍偏文橋賊壘以疑之以一軍斷梧桐嶺賊援層層按伏而進該
逆出隊抵禦酣戰逾時我軍人人自奮賊屍盈野是夜賊屯毛家
店花尖山等處以圖一逞二十九日江忠義督隊迎勦諸將爭先
奮擊兩路之賊同時敗潰羣酋氣奪然猶恃其堅壘重濠負隅抵
拒石太等處之匪復更番出擾亟肄罷我七月初一日劉典席寶
田顧雲彩各軍擊賊於青山橋斬馘二千有餘屈蟠擊賊於段家

洲挫其前鋒賊匪數路併集愈聚愈多屈蟠督率各營縱橫盪決
水師復以巨礮轟擊賊始敗遁初三日夜江忠義李榕等軍潛薄
文橋賊壘乘勢踰濠焚殲無算僞跟王尙以二萬餘眾堅踞上下
彭不動初四至初六等日席寶田等督軍奪隘縱火賊眾驚潰追
至谷口適僞祐王率援賊數萬鈔出官軍後路都司夏基鴻等斂
眾血戰短兵相接一以當百賊遂大潰祐逆向建德遁去都湖各
隘踞逆奪路紛竄各營裹糧窮追殲斃無數前後斬馘萬餘解散
脅從並拔出難民數萬江境一律肅清據擒賊供稱該逆初意由
鄱浮竄入腹地嗣因鄱浮屢撼不動乃踞濱湖各隘堅壁儲糧爲
固守計比以官軍四面兜剿歸路垂斷乃謀遁回石太再從徽屯
以窺婺樂等語見在江忠義擬進紮東流順途埽蕩彭澤餘匪劉
典以派隊入徽擬出羊棧嶺會擊以清皖境

臣

查該逆號稱數十

萬竄擾江西迨屢次受創無路逃生又成困獸之鬪各將士齊心
用命累口血戰遂能摧此巨寇實非意料所及 上諭議政王軍
機大臣等逆匪麇聚都鄙等處窺伺江右腹地經沈葆楨督飭江
忠義等軍奮力勦擊匪勢敗潰僞祐王奔竄建德各隘口逆酋紛
紛竄遁江境一律肅清辦理甚爲得手見在賊眾被勦窮蹙謀遁
回石太再從徽屯以窺婺源江忠義擬紮東流劉典已派隊入徽
惟祐逆尙擁眾數萬盤踞建德必須悉數殲除方無後患著曾國
藩沈葆楨飭令江忠義等跟蹤擊勦以勦爲防務將此股匪徒殄
除淨盡並將石太等處股匪一律掃蕩乘勝東下以免後顧之憂
池州防務緊要曾國藩嚴飭該處守將協力防勦毋任再行狂竄
左宗棠卽飭劉典一軍出羊棧嶺會擊毋令闖入徽境彭澤等處
餘匪沈葆楨派隊搜勦皖境擊勦得力難保各匪不鋌而走險仍

圖回竄該撫須嚴扼江防督飭地方文武員弁竭力固守勿稍懈弛俟此股匪眾全行殲滅劉典一軍仍當駐徽防剿以顧浙境曾國藩卽將江忠義李榕諸軍酌量派赴金陵交曾國荃調遣以厚兵力將此由六百里各諭令知之○壬申頒賞王大臣暨內廷翰林各省督撫 文宗顯皇帝御製詩文集各一部○諭議政王軍機大臣等吳棠奏蒙城皖軍撤動見籌防剿情形一摺據稱唐訓方以臨淮被圍緊急飛調馬新貽全軍赴臨助剿擬飭姚廣武英翰駐防蒙城惟姚廣武一軍尙應兼顧徐宿該漕督見飭艾憲銀一軍專顧徐宿一帶剿辦擒匪而以姚廣武爲遊擊之師回駐侯圩視蒙城徐宿何路有急卽援何路其蒙城城守事宜請飭英翰入城駐紮等語所籌不爲無見見在蒙北餉道雖通而城圍未解姚廣武一軍雖不能入駐蒙城該漕督仍當飭令妥爲策應一有

緊急卽當飛催馳援毋得顧此失彼至馬新貽見已調赴臨淮其英翰一軍應否令入駐蒙城之處並著唐訓方妥籌調遣以資守備昨據僧格林沁奏教匪盤踞紅山黃國瑞一軍堵剿東面礙難抽調擬俟教匪殲滅卽飭該總兵統軍赴皖等語黃國瑞之軍旣難剋期赴皖其蒙臨戰守事宜卽著唐訓方仍就見有兵力竭力支持毋稍疏失以待援師將此由六百里各諭令知之○癸酉諭議政王軍機大臣等張之萬毛昶熙奏肅清毫北匪寨追擊竄捻進剿老巢一摺官軍自埽平盧廟捻圩後副將黃貴誠復會同亳州知州李文森收復吳廟口寨並將吳各拉寨克復王莊及王大莊兩寨陸續投誠都司王鳳山復攻破劉大莊寨權家寨附近楊廟寨等處因逆首遠遁俱各投誠辦理尙屬得手惟毫北捻圩眾多肅清非易該匪黨等兵去則聚眾滋事兵來則相率投誠習爲

故常難保不於撤兵後又形反覆毛昶熙務當辦理妥實隨時防範並著飭令地方官及帶兵將弁實力稽查責令投誠寨首將捻眾黨與及素不安分匪徒按名舉出悉數正法以杜後患巨捻張總愚程二老坎等糾集白龍廟等處數十集捻眾由亳南竄入太和縣境有西趨陳州之勢黑旗股匪復欲隨後出竄豫省東南邊防尤形喫重著張之萬毛昶熙卽嚴飭陳州在防文武會合兵團齊心堵禦並飭總兵張曜等會同孫之友等馬隊兩面攻擊痛加勦洗毋任匪蹤闖入豫疆致腹地又被蹂躪亳州東南一帶賊寨甚多卽著毛昶熙督飭總兵趙鴻舉統帶各營扼要進剿勿令復行出竄致與前股會合並將該處捻巢次第掃蕩以期進剿雉河集等處老巢毋稍鬆勁將此由六百里各諭令知之○諭總理各國事務衙門奏勘分西界事宜無可再議見在籌辦情形一摺前

據常清奏俄國因分界未定闖卡尋釁撲壓營盤並有揚言攻取索倫沙岡再取喀什噶爾及繞入伊犁城情事經總理衙門面加辯駁該公使以實因邊界未能早定恐該地民人滋事是以派兵彈壓委無自恃之意等詞照覆著明誼明緒酌量各該處情形會同該國分界使臣准照該使臣議單妥爲辦理一面照會該國西悉畢爾約定勘界日期並著常清行知喀什噶爾及各城大臣一體妥爲照辦俾釋猜嫌惟已分入該國之哈薩克布魯特人等該國如何安輯其仍隸我界之哈薩克人眾及烏梁蒙古等如何安插勿失其心並應於分界時妥立一切章程以期久遠相安之處卽著明誼明緒等詳籌妥辦無稍疏漏將此由六百里各諭令知之○玉明等奏查明錦州黑地請照例升科允之○甲戌僧格林沁國瑞奏白蓮池教匪竄踞紅山負嵎死守各營官軍用炸礮晝

夜轟擊賊中死傷過眾糧食已盡欲由西南奔竄臣等飭翼長舒通額等選派馬隊赴西南山嶺下設伏並令舒通額帶領馬隊扼守東北七月二十二日夜間山上人聲喧亂總兵黃國瑞督隊由北面雲蒙寺首先搶上山梁撲入賊寨當將西山賊眾與東山之賊衝作兩路其時西面賊眾由西北撲竄下山臣國瑞督兵自西北截擊該逆勢不能支紛紛亂竄我軍刀砍矛刺賊屍積徧山谷落澗死者不計其數黃國瑞舉火焚寨並督兵將東山賊眾截住圍殺殆盡其撲下之賊向西南擁撲守牆兵勇開放連環槍礮擊斃賊匪二百餘名並擒獲匪首郭瀾岡等犯逆眾拌命竄撲衝破石牆丈餘大股賊匪一齊竄出臣國瑞卽派德楞額等帶領各營步隊趕緊追剿適委營總常德等帶豫伏馬隊從旁橫擊舒通額又由西北繞至合力追殺賊眾向南狂奔我軍緊蹙其後沿途殲

斃無算賊匪竄赴岡山八頂岡盤踞德楞額等步隊趕到立將岡
山圍定賊卽避入山洞連日搜殺擒斬無數隨將首逆李九擒獲
統計先後斃賊一萬數千名其匪首宋繼朋屍身亦在雲蒙寺山
坡查獲並擒獲宋繼朋之妻高氏並弟宋繼溪逆孫亭兒及逆族
男婦六名口又搜獲匪首李化亭王春芳當將宋繼朋首級懸竿
示眾並將宋繼溪等一併正法見經臣僧格林沁商令臣國瑞暫
駐鄒境率同德楞額等督同總兵扎隆武官軍搜拏餘匪平毀賊
巢查蒙城待援孔亟見在敎匪已除臣等當派總兵黃國瑞帶領
馬步三千餘名卽日啟程星馳赴皖速解蒙城之圍惟河北宋憬
詩一股尙未撲滅亟應趕緊殲除鄒縣境內臣等已畱兵彈壓卽
使擒匪李大箇子欲行北竄亦可就近堵剿臣僧格林沁卽日督
帶舒通額馬隊八百餘名馳往東昌以便督飭蘇克金恆齡相機

進剿此次尤爲出力各員謹先行開列仰懇 天恩獎勵 上諭
議政王軍機大臣等僧格林沁等奏攻克教匪山寨生擒首惡及
撥兵馳援蒙城一招覽奏欣慰僧格林沁自攻克淄川移營剿辦
教匪甫經匝月卽能掃穴擒渠膚功迅奏見復移師東昌督剿宋
逆實屬不辭勞瘁忠勇可嘉著卽會同劉長佑督飭恆齡蘇克金
保德丁寶楨等將宋憬詩股匪一鼓殄除以便統師南下教匪頭
目宋繼朋李九等已就駢誅此外或不免有餘匪潛匿咨令閭敬
銘督飭地方文武各員認真按捕國瑞帶兵暫駐鄒縣搜捕餘匪
該大臣當令實力辦理毋令餘燼復然致貽異日之患本日據唐
訓方奏苗逆於淮河兩岸增壘塞河前敵運道竟無一綫可通該
撫不得已將水陸各軍撤退兵勇傷亡甚多困敝之餘非大爲休
息不能再戰見恃舟師爲犄角僅能力保老營而南之鳳陽北之

蒙城賊勢仍復滋蔓臨淮危急更甚於前請飭僧格林沁派令陳國瑞援蒙都興阿派兵援臨淮張曜進兵潁上各等語本日雖已諭令都興阿撥兵赴援而江防甚緊能撥與否尙未可知又適據張之萬奏張總愚糾集程大老坎李庫等捻股竄偃汴城張曜回軍援應亦難前往見在僧格林沁已令陳國瑞帶兵三千餘名赴皖著卽督飭該總兵星夜前進以壯臨淮聲勢所有該總兵一軍應行駐紮何處攻打何路已諭令唐訓方妥籌調度仍著僧格林沁飭令該總兵聽候唐訓方指示奮勉圖功惟此時皖北情形萬分喫緊非陳國瑞一人所能奏功該大臣於北路肅清後卽應迅速南征用申天討唐訓方摺著鈔給閱看將此由六百里諭令知之○唐訓方奏苗逆連日於淮河兩岸增壘八十餘座又以船填塞甌石或沈或浮復於梳上重施鐵鎖橫截河道我軍晝夜苦攻

該逆竭力抵禦前敵運道竟無一綫可通臣竊計前次送糧僅敷數日而前後困逼危迫萬分不得已檄令統帶各員將全師撤退臣豫料賊必跟追先派何紹彩克蒙額等率馬步隊設伏於小蚌埠一帶賊果大隊追至遇伏驚退黃開榜成發翔丁泗濱王吉等礮船復連環轟擊斃賊甚多賊未敢乘勢徑逼臨淮惟兵勇困敝之餘非大爲休息勢難使之再戰見恃舟師爲犄角僅能力保老營而南之鳳陽北之蒙城賊勢恐復滋蔓臨淮爲皖北屏障設有疏虞南北不堪設想惟有仰懇 天恩速飭僧格林沁派黃國瑞馳援蒙城張之萬飭張曜速進潁上都興阿分撥數營進援臨淮趁此時尙可支持合力同心約期大舉庶賊以備多力分而堵穴掄渠乃可徐議不獨臨淮一軍之幸也張之萬奏捻首張總愚等因聞僧格林沁大軍卽日南下懾於聲威遂糾集程大老砍李庫

等各股馬步賊約有萬人由鹿邑南境避兵疾走七月二十一日
總兵保英等各率所部由陳州探蹤迎擊擒斬多名而寇蹤剽疾
其大股已於是日竄入太康縣屬五里口一帶賊騎四出裹掠二
十二日擾及扶溝縣之大石橋等處距城不及十里該縣知縣鄒
金生募勇登陴晝夜嚴備二十四日通許尉氏縣境已見賊蹤勢
漸北趨逼近省垣臣查該逆倉皇出竄莫定所向前聞苗沛霖有
密約該捻潛襲汴垣牽掣我軍之說今捻勢北趨距省僅百餘里
則苗逆指使之說似非無因臣聞警後飭都司連美等率領所部
益以臣營馬步親軍連夜拔營進紮通許遏賊北犯知會臣毛昶
熙迅派得力員弁挑選馬步精銳星夜取道鹿柘鈔出賊前迎頭
截擊並飛檄張曜督率所部由陳州進剿以防賊竄汝南之路俟
宋軍鈔到卽令與張曜各營合力勦擊以殲窮寇臣見率在城司

道布置城守日夜嚴防以期有備無患仍隨時相度機宜何路喫緊卽派兵往何路策應不敢稍形疏懈 上諭臨淮爲皖北屏蔽關繫甚重苗逆注意於此計甚狡毒必須竭力固守方可沿長淮南北次第進兵剪除苗逆本日據僧格林沁奏業經該親王調派陳國瑞一軍前赴蒙城援救著唐訓方派員迎催赴皖並著該撫酌度緩急何路喫緊卽派該總兵前往攻剿至僧格林沁移紮東昌勦辦宋憬詩股匪一俟削平後卽親督馬步全軍南下頃據張之萬奏捻首張總愚等由鹿邑竄至太康扶溝縣屬通許尉氏縣境亦有賊蹤苗沛霖有密約該捻潛襲汴城之說是張曜一軍爲所牽掣勢不能徑趨潁上雖經諭令都興阿酌度數營赴臨亦慮緩不濟急必得就近一枝勁旅會同臨營夾擊方可迅速奏功前據曾國藩奏李世忠愧悟漸生頗知斂抑該提督以五河爲臨淮

後路儘苗逆下竄誓必決一勝負等語李世忠失陷二浦朝廷不加嚴譴原冀其感激愧奮勦賊自效該提督前派總兵朱元興帶兵一千五百餘人來臨助剿是其志切同仇力顧大局尙屬奮勉可嘉著唐訓方卽檄飭朱元興督勇由劉府一帶進剿附近苗圩以牽賊勢李世忠旣欲出力報效與其駐勇五河專俟賊至何如督飭所部由五河星馳前進以拯臨淮之急並著曾國藩卽行札調該提督迅速進兵毋稍遲誤記名運司李元華前據吳棠奏請調營差遣該員曾否赴吳棠軍營如尙在六安本籍或飭令招集舊日團勇進紮潁上或陽攻下蔡亦足以牽掣苗逆使其回顧並著曾國藩等酌量辦理曾國藩接奉此旨後察看李世忠近日情形如果私仇公憤發於至誠卽將此旨摘錄傳諭並須坦白相待使之不疑令其知感知愧樂爲我用李世忠是否可資其力此旨

可否摘錄傳諭並著曾國藩酌量辦理隨時覆奏將此由六百里加緊各諭令知之○諭苗沛霖於淮河兩岸增壘塞河前敵運道竟無一綫可通據唐訓方奏不得已將進攻懷遠水陸各軍撤退兵勇傷亡甚多困敝之餘非大爲休息不能使之再戰請飭僧格林沁派令陳國瑞馳援蒙城張之萬飭張曜速進潁上都興阿分撥數營救援臨淮本日據僧格林沁奏攻克教匪山寨生擒首逆已令該總兵帶兵三千餘名馳援蒙城當諭該大臣催令星速前進惟臨淮軍情如此緊迫僧格林沁之軍因回剿宋懋詩一股未能全隊啟行兵力尙覺單薄此時江北防務雖屬緊要而臨淮亦爲皖北關鍵都興阿等能否於揚防抽撥數營前赴臨淮助剿著卽妥籌一面派撥一面具奏裏下河之防必須處處嚴密並著會同吳棠飭所屬文武各員認真防範吳棠仍當嚴飭姚廣武等實

力會勦不得稍有退縮如有就近可撥兵勇並卽趕緊派撥臨淮軍餉當源源接濟毋令譁潰諒吳棠必能力顧大局記名運司李元華曾否到營若令招集舊日團勇由六安進紮潁上以牽制逆練之黨使之反顧則蒙懷可以稍鬆本日已諭知曾國藩酌辦並著吳棠酌量辦理毫捻由鹿邑邊境西竄太康扶溝等縣擾及通許並知會毛昶熙派兵鈔擊力扼西北兩路飛檄張曜督所部由陳州探蹤進剿所籌均妥卽著毛昶熙迅派得力將弁挑選馬步精銳星夜取道鹿柘鈔出賊前迎頭截剿並會合張曜等兵實力夾擊就地殲除無任北犯汴垣空虚張之萬當督飭司道等辦理防守事宜惟守郭不如守險該撫見帶兵旋省恐各軍因而懈怠仍當駐軍扼要之地以剿爲防勿令直偪省垣方不致有疏失唐訓方所請令張曜進紮潁上之處著俟此股捻匪剿辦完竣卽令

相機進紮以牽苗逆之勢將此由六百里加緊各諭令知之○僧格林沁奏請飭已革直隸總督文煜已革直隸按察使孫治調赴軍營差委允之○僧格林沁奏總兵官黃國瑞請復姓爲陳國瑞允之○以山東攻克白蓮池匪寨殲斃首逆宋繼朋欽差大臣僧格林沁得旨嘉獎賞已革侍郎國瑞御前侍衛並賞白玉搬指翎管各一支大小荷包一對總兵官陳國瑞頭品頂帶都司李福巴圖魯名號守備趙世良花翎縣丞趙鍾驥等藍翎餘升敘有差○以兗州等屬被擾地畝荒廢飭山東巡撫招墾並免租二年○是月豁免貴州都勻等七府平越等二十九州廳縣暨清江下江二通判錦屏鄉縣丞所屬被擾新舊額賦並湖南鳳凰等七廳縣河南歸德府濰地積欠租銀蠲緩江西蓮花等十九廳縣暨九江府同知所屬被水被旱新舊額賦